

# **Mokoĩa kuaxia Samuel 'epyre oĩa**

## **Mokoĩa kuaxia Samuel 'epyre oĩa**

Kova'e kuaxia ma Davi rekokue oĩa, huvixa oĩ jave guare. Jypy ma Judá regua kuery ruvixa oĩ. Ha'e rire ma Israel kuery ha'e javi ju oipota huvixa oĩ aguã.

Davi ma Nhanderuete re ojerovia ete va'e. Ha'e ramo ojapo ngovaigua kuery ha'e javi re ipo'aka aguã rami. Ijyvate ete, ha'e heta va'e kuery ha'e javi ombojepokuaapa ojee. Ha'e rami teĩ itavy reia py ojapo vai guive. Ha'e ramo ixupe profeta Natã ijayvu ramo Davi onhemombe'u: “Ajeavy raka'e Senhor pe.” Natã ombovai Davi pe: “Senhor ndeperdoa rejeadvyague gui. Ndee ma nere-manoi 'rã. Ha'e rami avi rejapo vaiague káuxa ma Senhor rovaigua kuery ijayvu rei okuapy. Ha'e gui ndera'y oiko rire omano 'rã”, he'i (12.13-14). Nhanderuete ombopaga rã Davi ojou porã ha'e ogueropo'aka. Ha'e rami teĩ Davi ro pygua kuery ojapo jepi iporiau aguã rami.

Davi ma Israel pygua huvixa ikuai va'e gui yvateve va'e oiko raka'e. Ha'e nunga rupi nhandereraa jepearã Nhanderuete ombou va'ekue pe ma “Davi ra'y” e'ŷ vy “Davi ramymino” 'ea. Davi ma heta salmo ojapo raka'e Nhanderuete pe oporai vy.

*Israel kuery oitypa ha'e Saul omano aviague  
Davi pe omombe'uague*

<sup>1</sup> Saul omano ma rire Davi ojevy ju Amaleque kuery oitypaague gui. Ha'e vy mokoï ára re oiko Ziclague tetã py.

<sup>2</sup> Mboapy araa py, Saul pegua kuery ijaty okuapya gui ou peteï ava ijao xoropa rei va'e, oakã áry yvy omoïmba rei reve.\* Davi oña py ha'e va'e ovaë vy ojero'a, yvy re oï guenapy'ã re.

<sup>3</sup> Ixupe Davi oporandu:

— Magui tu reju?

Ombovai:

— Anha ajuvy Israel kuery ijaty okuapya gui — he'i.

<sup>4</sup> Davi oporanduve ju:

— Mba'e tu oiko ha'e py? Emombe'u ke xevy.

Ombovai:

— Joguero'aa gui ore kuery ronhamba, heta ho'a vy omano rã, Saul ha'e ta'y Jônatas guive — he'i.

<sup>5</sup> Ha'e rami rã Davi aipoe'i kunumi imombe'ua va'e pe:

— Mba'exa tu ha'vy reikuua Saul ha'e ta'y Jônatas omanoa?

<sup>6</sup> Ha'e rã kunumi imombe'ua va'e aipoe'i:

— Avaë xapy'a rei Gilboa yvyty re. Ha'e rã Saul ojeko oiny guembiporu hu'y re. Ha'e gui karóxa ha'e kavaju árygua kuery ojokove tema okuapy.

<sup>7</sup> Guakykue katy oma'ë vy xerexa vy xerenoï. Ha'e ramo xee “Apy ma aï” ha'e ixupe.

\* **1:2** Oao omendoropa rei ha'e oakã re yvy omoï Saul omanoague re ipy'a vai vy (Gênesis 37.29,34, 1 Samuel 4.12, 2 Samuel 1.11).

<sup>8</sup> Xevy pe oporandu “Mava'e tu ndee?” he'i ramo xee ambovai: “Xee ma Amaleque regua”, ha'e.

<sup>9</sup> Ha'e ramo aipoe'i xevy: “Eju ha'vy, xe'áry epu'ã he'amy ha'e xejuka, mba'eta xerajyjeapa rei va'eri xerekovea oime teri”, he'i.

<sup>10</sup> Ha'e ramo hi'áry apu'ã ha'amy vy ajuka, mba'eta xee aikuaa porã ndoikovei 'rää ho'a ma rire. Ha'e vy coroa oĩ va'ekue ajopy ha'e ipoapy regua, ha'e gui aru apy ndevy xeruvixa – he'i.

### *Davi ojuka ukaague Amaleque regua*

<sup>11</sup> Ha'e rami rã Davi oao ae ojopy vy omondoro, avakue hexeve ikuai va'e ha'e javive Davi ojapoa rami avi ojapo okuapy.

<sup>12</sup> Iporiaupa, ojae'opa okuapy, ha'e va'e ára okaru e'ý re ikuai ka'aru peve, Saul ha'e ta'y Jônatas omano ramo, ha'e SENHOR pegua Israel kuery re guive, kyxé py ho'apa rire.

<sup>13</sup> Davi aipoe'ive ju kunumi imombe'ua va'e pe:  
– Maguigua tu ndee?

Ombovai:

– Xee tu amboae guigua ra'y, Amaleque regua – he'i.

<sup>14</sup> Davi aipoe'i ixupe:  
– Mba'exa tu nderekjyei ri ra'e SENHOR oiporavo va'ekue rovai ndepo reupi aguã?

<sup>15</sup> Ha'e gui ma Davi oenoĩ peteĩ kunumi va'e. Ha'e vy aipoe'i:

– Eju, epu'ã peva'e ava re – he'i. Ha'e ramo oipyxo rã omano.

<sup>16</sup> Davi aipoe'i va'ekue:  
– Ndere ae toĩ nderuguy moẽague repaga aguã, mba'eta ndejuru py ae nderovai remombe'u vy “Ajuka SENHOR oiporavo va'ekue”, 're va'ekue.

*Saul ha'e Jônatas re Davi ipy'a vaia rupi oporaiague*

**17** Ha'e gui Davi ojae'o Saul ha'e ta'y Jônatas re. Po rami oporaei iporiaua rupi.

**18** Judá ra'y kuery ha'e javi ombo'e uka avi kova'e mboraei guyrapa regua, kuaxia para heko porã va'e kuery rekokue oĩa va'e re.

**19** – Israel kuery, perovy'a rei va'ekue ho'a ma pendeyvy re yvy'ã oĩ va'e re!

Mba'exá tu ipy'a guaxukueve ho'apa!

**20** Ha'e rã Gate tetã py ma pemombe'u eme, peikuua uka eme guive Asquelom tetã py tape ikuai va'e rupi,

filisteu kuery rajy kuery oguerovy'a rei e'ŷ aguã,

opire omboi uka e'ŷ va'e rajy kuery ový'a rei reve opo-opo e'ŷ aguã.<sup>†</sup>

**21** Ha'e gui Gilboa yvy'ã peiko va'e, pende'áry to'ave eme yxapy neĩ oky, pendere toikove eme mba'emo aju, mba'eta ha'e py ma ipy'a guaxukueve mba'e hu'y jokoa ojeatypa yvy re, Saul mba'e hu'y jokoa voi ho'a rire nombover-aavei ma 'rã azeite py.

**22** Jônatas peteígueve ma voi ndogueropytu'ui va'ekue guapa, neĩ Saul ndogueru jevy rivei va'ekue okyxé, ojuka va'ekue ruguy ha'e ipy'a guaxukueve kyrakue oĩ e'ŷ re.

**23** Saul ha'e Jônatas ma ijá'ea ha'e oayvuve pyre, oikovea ja ha'e omano ma teĩ nomboja'oai!

---

<sup>†</sup> **1:20** Gate ha'e Asquelom ma Israel rovaigua kuery filisteu va'e retã.

Taguato gui ipojavave,  
ha'e guary gui imbaraeteve va'ekue.

- <sup>24</sup> Peẽ Israel rajy kuery, pejae'o Saul re,  
ajukue pytã va'e py pemonhemonde,  
ha'e ouro guigua py pendeao ombojegua  
va'ekue re.
- <sup>25</sup> Mba'exa tu ipy'a guaxukueve ho'apa raka'e  
joguero'aa py!  
Jônatas voi ojukaa yvy'ã re!
- <sup>26</sup> Xeryvy Jônatas, xeporiau aikovy ndere!  
Ndee xerayvu vaipa va'ekue!  
Xerayvu ete vy  
kunhague gui voi ndee xerayvuve va'ekue.
- <sup>27</sup> Mba'exa tu ipy'a guaxukueve ho'apa,  
ha'e hembiporu joguero'aa pygua  
okanhymba! — he'i.

## 2

### *Judá pygua ruvixarã Davi omoõ okuapyague*

<sup>1</sup> Ha'e va'e rire Davi oporandu SENHOR pe. Ha'e  
vy aipoe'i:

— Aa 'rã teve Judá tetã regua py?

SENHOR ombovai:

— Tereo — he'i.

Davi oporanduve ju:

— Mamo katy ete 'rã aa?

SENHOR ombovai:

— Hebrom katy — he'i.

<sup>2</sup> Ha'e ramo Davi oo ha'e katy. Ta'yxy mokoõve  
oje'oi avi: Jezreel pygua Ainoã ha'e Carmelo pygua  
Nabal ra'yxykue'i Abigail.

<sup>3</sup> Davi oguerupa avi hexevegua avakue, peteĩ-teĩ ta'y kuery reve. Ha'e rami vy Hebrom tekoá py ju ikuai.

<sup>4</sup> Ha'e gui Davi oĩa py Judá pygua avakue ou vy omoĩ nguvixarã. Davi pe omombe'u avi:

— Avakue Saul retekue nhono porãare ma Jabel-Gileade pygua meme — he'i.

<sup>5</sup> Ha'e ramo Jabel-Gileade pygua avakue pe Davi omondouka ayvu mombe'uarã kuery aipoe'i aguã: “Tove SENHOR tapenemoingo porã, penderuvixakue pe pejapo porãague re, Saul retekue penhono porã rire!\*

<sup>6</sup> Ha'e gui aÿ ma tove SENHOR tapenderereko penemboaxyha'e ojeroviapy oikoa rupi. Xee voi ajapo porã 'rã ha'e rami pejapo porãague re.

<sup>7</sup> Aÿ ma pendepo ta'imbaraete, tapendepy'a guaxu guive, mba'eta penderuvixa Saul omano ma teĩ xee ju Judá regua kuery xemoĩ nguvixarã” he'i uka.

### *Israel pygua ruvixarã Abner omoĩague Isbosete*

<sup>8</sup> Ha'e gui Saul pegua xondaro kuery ruvixa Ner ra'y Abner ma Maanaim tetã py ogueraa Saul ra'ykue Isbosete.

<sup>9</sup> Ha'e py ma omoĩ huvixarã Gileade yvy re, Aser, Jezreel, Efraim, Benjamim ha'e Israel ha'e javi re opena aguã.

<sup>10</sup> Saul ra'ykue Isbosete ma quarenta ma'etã rivyvyi oguerekoo Israel re opena ypy'i jave. Ha'e

\* <sup>2:5</sup> Jabel-Gileade tekoá ma Davi retarã kuery Judá regua e'ÿ, Israel regua ramo ma ha'e pygua kuery reve ijayvu porã'i, ixupe guarã ju ikuai aguã.

vy mokoĩ ma'etŷ peve'i oĩ. Judá regua kuery anho ikuai Davi pegua.

**11** Davi ma sete ma'etŷ ha'e seis jaxy re opena Judá pygua kuery re, Hebrom tetã py ae.

*Isbosete pegua kuery re Davi pegua kuery ipo'akaague*

**12** Ha'e gui Ner ra'y Abner ma Maanaim gui ogueraa Saul ra'ykue Isbosete pegua avakue Gibeão peve.

**13** Ha'e rã Davi pegua avakue ma Zeruia pi'a Joabe ogueraa avi ha'e py. Ha'e rami vy nhovaeximba Gibeão yy omboty pyre katy'i. Jovaive-ive re ikuai, hovai katy ha'e kyvõ katy.

**14** Abner aipoe'i Joabe pe:

— Topu'ã      kunumigue,      tajoguero'a  
nhanerenonde.

Joabe ombovai vy

— Topu'ã ha'vy — he'i.

**15** Ha'e rami rã opu'ã jogueruvy jojo'i rami: doze Benjamim regua Saul ra'y Isbosete pegua, ha'e gui doze avakue Davi pegua ju.

**16** Peteĩ-teĩ ojopy ngovaigua akã re, jopyxo kyxe py joyke py. Ha'e vy jojavi ho'apa. Ha'e rami rire ha'e va'e henda pe ma "Yvy kyxe" 'ea, Gibeão katy'i oĩ.

**17** Ha'e va'e árave joguero'ave tema okuapy. Ha'e rã Davi pegua avakue oitypa Abner ha'e Israel regua kuery re.

*Abner ojukaague Asael*

**18** Ha'e py ma ikuai Zeruia pi'a mboapyve: Joabe, Abisai ha'e Asael. Asael ma guaxu ka'aguy regua rami inhakuã va'e.

**19** Ha'e gui Asael ma Abner rakykue oo. Oeka ovya rupi ndoikei oiporu kuaa katy, neĩ oiporu kuaa e'ŷa katy ma voi.

**20** Ha'e ramo Abner guakykue katy oma'ẽ vy oporandu ovy:

— Ndee ae ri ty'y Asael?

Ombovai vy:

— Xee ae ri — he'i.

**21** Ha'e ramo Abner aipoe'i ixupe:

— Eike ha'vy reiporu kuaa katy, e'ŷ vy reiporu kuaa e'ŷa katy. Ejoguero'a peteĩ kunumi va'e reve, ixugui ae eipe'a hembiporu joguero'aa pygua — he'i teĩ Asael ma ndojep'eaxei hakykue ooa gui.

**22** Teĩgue ju Abner aipoe'i ixupe:

— Ejep'e na xerakykue gui. Mba'e re tu xee rojuka ta, ha'e yvy py roity rive? Ha'e rami vy mba'exa tu xee ajoexa ta nderyvy Joabe reve?

**23** Ha'e rami teĩ Asael ndojep'eaxei ae ramo hye py Abner oipyxo hu'y guaxu rapyta py rive, ikupe gui omboaxa. Ha'e ramo Asael ho'a vy ha'e pyve omano. Omanoague py ovaẽ va'e tema optya kuerei 'rã.

### *Abner pegua avakue rakykue Joabe ooague*

**24** Ha'e gui Joabe ha'e Abisai ju Abner rakykue oje'oi. Kuaray oike'i ma jave ovaẽ jogueravy Amá yvy'ã re. Ha'e va'e ma Giá katy'i oĩ, Gibeão tekao e'ŷa katy tape oo va'e yvy'iry.

**25** Ha'e gui Benjamim ra'y kuery ono'õmba vy Abner rupive oje'oi vy peteĩ yvy'ã apyte áry ijaty okuapy peteĩ rami.

**26** Ha'e ramo Abner ojapukai Joabe pe. Ha'e vy aipoe'i:

— Kyxe py nhanhomomba riae 'rā teve? Ndereikuaai teve opaa py joe nanhandea'evei 'rāa? Raka'e peve 'rā tu neremombytu'ui penderegua kuery reve orerakykue peoa gui?

<sup>27</sup> Joabe ombovai:

— Anhetē ete Nhanderuete oikove va'e rery rupi aura vy aipoa'e: Nami nandeayvui va'e rire ko'ẽ rā aje'ive'i mae ma 'rāgue ore kuery ropytu'u oreryvy kuery rakykue rupi rooa gui — he'i.

<sup>28</sup> Ha'e rami vy Joabe mimby guaxu omonhe'ẽ rā ha'e kuery ha'e javi opytapa, ha'e vy ndooovei Israel kuery rakykue rupi, ndajoguero'a nhoi guive.

<sup>29</sup> Ha'e ramo ha'e va'e pytū mbukukue re Abner ha'e ixupegua avakue oguata yvy joja reia rupi. Jordāo yakā oaxapa vy aje'ive'i reve oguatave vy ovaẽmba Maanaim py.

<sup>30</sup> Ha'e rami py Joabe ndooovei Abner rakykue. Ha'e vy ojeupegua kuery omboatypa rā oata ra'e dezenove Davi pegua avakue, Asael oipapa e'ŷ re.

<sup>31</sup> Va'eri Davi rembiguai kuery ma trezentos e sessenta avakue ojuka va'ekue Benjamim regua Abner reve oje'oi va'ekue, ha'e ramo omanomba.

<sup>32</sup> Asael retekue ma ha'e kuery ogueraa vy onhono porā okuapy tuu rupa py ae, Belém katy'i. Ha'e va'e pytū mbukukue re Joabe ha'e avakue hexeve ikuai va'e oguatave vy Hebrom tetā py iko'ẽmba jogueravy.

### 3

<sup>1</sup> Davi ro pygua kuery reve Saul ro pygua kuery joguero'a are raka'e. Ha'e rami teĩ Davi kuery

imbaraeteve, ha'e rã Saul ro pygua kuery ma ikangyve oje'oivy.

*1 Crônicas 3.1-4*

<sup>2</sup> Hebrom tetã py Davi ra'y kuery ikuai. Ta'y ypy'i ma Jezreel pygua Ainoã pi'a Amnom.

<sup>3</sup> Mokoña ma Carmelo pygua Nabal ra'yxykue'i Abigail pi'a Quileabe. Mboapya ma Gesur pygua huvixa Talmai rajy Maaca pi'a Absalão.

<sup>4</sup> Irundaya ma Hagite pi'a Adonias. Peteĩ nhiruña ma Abital pi'a Sefatias.

<sup>5</sup> Mboapy memea ma Davi ra'yxy Eglá pi'a Itreão. Ha'e kuery ma Davi ra'y kuery Hebrom py ae ikuai va'ekue.

*Davi reve peteĩ rami ikuai aguã Abner ojapoague*

<sup>6</sup> Davi ha'e Saul ro pygua kuery joguero'a jave Saul ro pygua ikuai va'e gui Abner ipo'akave ovv.

<sup>7</sup> Oiko avi raka'e Saul ra'yxy jevykue Rispa hery va'e, Aiá rajy. Ha'e gui Isbosete oporandu Abner pe:

— Mba'e re tu ndee renheno xeru ra'yxy jevykue reve?

<sup>8</sup> Ha'e rami Isbosete ijayvu rã Abner oendu vy ivai vaipa ixupe. Ha'e vy aipoe'i:

— Xee ri ty'y jagua akã aiko, Judá kuerya katy aa aguã? Ange teri ajapo porã nderu Saul ro pygua kuery pe, tyvy ha'e irã kuery pe guive. Xee ma noromboaxai Davi po py. Ha'e rami teĩ aÿ remombe'u ha'e va'e kunha reve atekoavya rami.

<sup>9</sup> Xee Abner Nhanderuete taxembopaga oipotaa rami, Davi pe SENHOR ouraague rami xee ndajapoi ri ramo.

**10** Mba'eta Saul ro pygua po'akaague amboaxa 'rã joupe. Ha'e rami vy ajapo 'rã Davi ju Israel ha'e Judá kuery re ipo'aka aguã rami, Dã guive Berseba peve – he'i.

**11** Ha'e rami Abner ijayvua Isbosete nda'evei ombovai aguã neĩ peteĩ ayvu'i py ma voi, okyje vy.

**12** Ha'e ramo Abner ojegui ae omondouka ayvu mombe'uarã Davi pe. Ha'e vy aipoe'i uka:

— Mava'e po py tu kova'e yvy itui? Xereve ha'vy ejapo peteĩ rami jaiko aguã, ha'e ramo xee roipytyvõ 'rã ndepo py Israel kuery ha'e javi amboaxa vy – he'i uka.

**13** Davi ombovai:

— Ha'eve, ndereve ajapo 'rã peteĩ rami jaiko aguã, va'eri peteĩ mba'e ma aipota: Xea py rejuveneru 'rã Saul rajy Mical. Ha'e rami e'ŷ vy nderexai 'rã xerova – he'i.\*

**14** Saul ra'ykue Isbosete pe voi Davi ombou ayvu mombe'uarã. Ha'e vy aipoe'i uka:

— Embou ju xera'yxy Mical, cem filisteu kuery pire amboague re xera'yxyrã ajogua va'ekue – he'i.

**15** Ha'e rami rã Isbosete kunha va'e oipe'a uka ju ime Paltiel Laís ra'y va'e ro gui.

**16** Ime oo ranhe oiny hakykue'i, ooa rupi ojae'o ovv Baurim peve. Ha'e rã ixupe Abner

— Tereo, ejevy ju eovy – he'i ramo mae ojevy.

**17** Ha'e gui Abner jogueroayvu Israel regua nhomongetaa ikuai va'e reve. Ha'e vy aipoe'i:

— Kueve ma pemoïxe Davi penderuvixarã.

---

\* **3:13** Saul rajy Mical ma Davi ra'yxyrã ome'ẽ va'ekue ri ixugui oipe'a vy amboae ava pe ju omboaxa raka'e (1 Samuel 18.27, 25.44).

**18** Aŷ ma pejapo ete, mba'eta Davi pe SENHOR ijayvu va'ekue: “Xerembiguai Davi rupi vy xevyguia kuery araa jepepa 'rã filisteu kuery ha'e hovaigua kuery ha'e javi po gui”, he'i va'ekue.

**19** Benjamim kuery pe ju Abner omombe'u uka ha'e rami ae. Ha'e vy Davi oĩa katy oo Hebrom tetã py, ixupe omombe'u aguã Israel ha'e Benjamim regua kuery ha'e javi oipota okuapya.

**20** Ha'e gui Hebrom tetã py Davi ro oĩ va'e py Abner ovaẽ, hexeve vinte avakue ou va'ekue reve.

**21** Ha'e rami vy Abner aipoe'i Davi pe:

— Xeruvixa, xee apu'ã vy aa 'rã Israel kuery ha'e javi amono'õmba aguã ndeea py, ndereve ojapo okuapy aguã ndevy ikuai aguã — he'i. Ha'e rami rã Davi Abner omondouka ramo oo porã'i.

### *Nhemí rupi Joabe Abner ojukaague*

**22** Ha'e jave ma Davi ha'e Joabe rembiguai kuery joguero'a vy oje'oiague gui oupa ju. Ngupive ogueru reta joegui oipe'a va'ekue. Ha'e rã Abner ma Hebrom tetã py noïvei ma Davi-a py, omondouka rã oo porã ma rire.

**23** Ha'e gui Joabe guexevegua kuery reve ou rã ixupe aipo'ea:

— Huvixa Davi-a py Ner ra'y Abner ou ra'e, ha'e gui omondouka rire oo porã ju ma oiny — 'ea.

**24** Ha'e rami rã huvixaa py Joabe oo vy aipoe'i ixupe:

— Mba'e tu rejapo ra'e? Abner ou ra'e ndea py. Mba'eda tu remondouka rive ju?

**25** Reikuua porã Ner ra'y Abner reko. Ha'e ma nembotavy aguã ou, ha'e mba'emo rejapo va'e re

oikuua pota vy oikuua aguā renhembopy'aa ha'e javi – he'i.

**26** Ha'e gui Davi-a gui Joabe ojepe'a ma vy Davi pe oikuua uka e'ŷ re omondouka ayvu mombe'uarā Abner rakykue, ha'e rami vy ojapo Sirá ygua gui ojevy aguā.

**27** Hebrom tetā py Abner ojevy ju ma ramo Joabe ogueroike okē rupi ha'e kuery ae'ia py jogueroayvu aguā merami. Ha'e vy hye py Joabe oipixyo ramo omano, guyke'y Asael ojukaague re oeypy vy.

**28** Ha'e rire ma Davi oikuua vy aipoe'i:

— Xee ha'e xevygua kuery ma SENHOR pe mba'eve py ndorojejavyi Ner ra'y Abner ruguy omoēague py, raka'e rā peve.

**29** Huguy moēague re opaga aguā toĩ Joabe ha'e tuu ro pygua kuery ha'e javi re! Joabe ro py toĩ riae ijai peupa va'e, lepra revegua, yvyla re oguata va'e, kyxe py ho'a va'e ha'e tembi'u oipota rei va'e voi – he'i.

**30** Ha'e rami py Joabe guyvy Abisai reve ojuka raka'e Abner, Gibeão py joguero'aa py tyke'y Asael ojukaague re.

### *Abner omanoague re Davi ojae'oague*

**31** Ha'e gui Davi aipoe'i Joabe ha'e hexevegua kuery ha'e javi pe:

— Pemondoro pendeano, penhemonde voxap, ha'e vy tapeo pejae'o peovy Abner retekue renonde ogueraa rā – he'i. Ha'e rā huvixa Davi ma mba'e guaxu ryru rakykue'i oo oiny.

**32** Ha'e rami vy Hebrom tetā py onhono porā okuapy Abner retekue. Abner onhono porāague

yvy'iry huvixa onhendu ratā reve ojae'o oiny.  
Heta va'e kuery ha'e javi ojae'o avi okuapy.

<sup>33</sup> Abner re huvixa ojae'o vy aipoe'i:

— Mba'e re tu Abner omano heko vai va'ekue rami?

<sup>34</sup> Mba'eta ipo ndojokuaai,

neĩ ipy re voi noĩ corrente.

Ha'e rami 'rāgue py heko vai va'e ra'y kuery po py ho'a rive va'e rami ho'a! — he'i.

Ha'e ramo heta va'e kuery ha'e javi ojae'ove hexe.

<sup>35</sup> Ha'e gui ma heta va'e kuery ha'e javi ou vy ojapo okuapy Davi okaru aguā rami, ára rei teri reve. Ha'e rami teĩ Davi oura vy aipoe'i:

— Kuaray oike e'ŷ mbove mbojape e'ŷ vy tembi'u mboae xee ha'u ramo tove Nhanderuete taxembopaga ha'e oipotaa rami — he'i.

<sup>36</sup> Ha'e rami Davi ijayvu rā heta va'e kuery oendu vy ojou porā okuapy, huvixa ojapo va'e rei ojou porā memea rami avi.

<sup>37</sup> Ha'e rami vy ha'e va'e ára guive ha'e kuery ha'e Israel kuery ha'e javi oikuaapa okuapy Ner ra'y Abner ojukaague py huvixa Davi mba'eve ndoguerekoiauge.

<sup>38</sup> Ha'e gui huvixa aipoe'i guembiguai kuery pe:  
— Ndapeikuaai teve ange Israel yvy re peteĩ ava yvateve ha'e imbaraete va'e ho'aague?

<sup>39</sup> Ha'e rā xee ma xekangy aŷ, huvixarā xemoĩa teĩ. Xegui ma kova'e avakue Zeruia pi'a kuery imbaraetekueve va'e. SENHOR ae tombopaga mba'emo vai apoare kuery ojapoague re — he'i.

## 4

*Isbosete ojukaa ague*

<sup>1</sup> Hebrom tetā py Abner ojukaa ague Saul ra'ykue Isbosete oendu vy ikangypa, ha'e Israel kuery ha'e javi okyjepa.

<sup>2</sup> Saul ra'ykue pegua mokoī ava oiko, xondaro kuery ruvixa meme. Peteī ma Baaná, ha'e rā amboae ma Recabe hery va'e. Beerote pygua Rimom ra'y va'e meme, Benjamim kuery regua, mba'eta Beerote ma Benjamim yvy regua ae,

<sup>3</sup> mba'eta Beerote pygua kuery yma guare onha vy Gitaim tetā py ova va'ekue. Ha'e py ae ikuai aŷ peve.

<sup>4</sup> Ha'e gui Saul ra'y Jônatas ma peteī gua'y oguereko va'ekue oguata e'ŷ va'e. Peteī nhiruī ma'etŷ rivyvyi oguereko va'ekue Saul ha'e Jônatas omanoague mombe'ua ou jave Jezreel gui. Ha'e ramo hexe opena va'ety oupi heravy oguerojava vy. Oguerojava aguā ojapura ramo ava'i ho'a vy oguata karē'i va'e oiko. Hery ma Mefibosete raka'e.

<sup>5</sup> Ha'e gui Beerote pygua Rimom ra'y kuery Recabe ha'e Baaná jogueraa vy Isbosete ro py ovaē. Kuaray mbyte jave hakuve ma ramo oke oupy.

<sup>6</sup> Ha'e py Recabe ha'e tyvy Baaná jogueroike jogueravy oguy katy, trigo re ou va'e rami. Ha'e rami vy oipyxo hye py, ha'e gui onha jepe.

<sup>7</sup> Ha'e kuery ma oguy py oike rā Isbosete ngupa okeaty py itui jave oipyxo vy ojuka. Ha'e rire inhakāgue ojaya vy ogueraa. Pytū mbukukue re oguata jogueravy yvy joja reia rupi.

<sup>8</sup> Isbosete akāgue ma ha'e kuery ogueru huvixa Davi pe Hebrom py. Ha'e vy aipoe'i ixupe:

— Apy ma nderovaigua Saul ndejukaxeare ra'ykue Isbosete akāgue. Xeruvixa, ha'e rami ange

SENHOR ojapo rejepy aguã rami Saul ha'e ta'y kuery ojapoague ha'e javi re – he'i.

<sup>9</sup> Ha'e rami teĩ Davi ombovai Beerote pygua Rimom ra'y kuery Recabe ha'e tyvy Baaná pe. Ha'e vy aipoe'i:

– Anhetẽ ete SENHOR oikove va'e xenhe'ẽ ojexavaia ha'e javi gui ogueraa jepe va'ekue rery rupi aura vy aipoa'e:

<sup>10</sup> Yma xea py amongue ayvu ogueru vy “Saul ma omano ma” he'i ramove araa vy Ziclague tetã py ajuka karamboae, ojeupe rã iporã va'e merami omombe'u rã.

<sup>11</sup> Ha'e gui heko vai va'e kuery katuve ma ambopaga'rã, peteĩ ava heko porã va'e ngoo py ngupa py ae itui va'e jukaare kuery. Ha'e rami vy aÿ xee rombopaga'rã huguy pendepo py pemoëague re, romomba'rã yvy gui – he'i.

<sup>12</sup> Ha'e rami vy Davi guembiguai kunumigue pe ijayvu rã ha'e kuery ojuka. Ha'e vy ipokue ha'e ipykue ojaya ma vy oupi imoiny Hebron tetã py, yy omboty pyre oĩ va'e yvy'iry. Ha'e rã Isbosete akãgue ma ogueraa vy Abner rupa katy'i ojaty, Hebron py ae.\*

## 5

### *1 Crônicas 11.1-3*

<sup>1</sup> Ha'e gui ma Israel regua kuery ha'e javi ou okuapy Hebron py Davi oĩa py. Ha'e vy ijayvu vy aipoe'i okuapy:

– Ore kuery voi ma nderegua kuery ae avi.

\* <sup>4:12</sup> Ha'e kuery ma Isbosete akãgue ojaya rire Davi ojaya uka ipo ha'e ipy.

**2** Yma Saul oiko teri vy orere opena jave py ndee ae reo ha'e rejevy 'rã va'ekue Israel regua xondaro kuery reve. Ha'e gui SENHOR aipoe'i: "Ndee repena 'rã xevygua Israel kuery re, reiko 'rã ha'e kuery ruvixa", he'i va'ekue ndevy – he'i okuapy.

**3** Hebrom py huvixa Davi-a py Israel regua nhomongetaa kuery ha'e javi ou ramo ha'e kuery reve Davi ojapo oguereko porã aguã regua, SENHOR renonde. Ha'e ramo omoĩ okuapy Davi nguvixarã Israel kuery re opena aguã.

**4** Davi opena ypy'i jave ma trinta ma'etýa oguereko. Ha'e gui ma quarenta ma'etý re opena.

**5** Hebrom py ma Judá kuery re anho ranhe opena sete ma'etý ha'e mboapy meme jaxy re. Ha'e gui Jerusalém py ju trinta e três ma'etý re opena Israel ha'e Judá kuery ha'e javi re.

#### *1 Crônicas 11.4-9*

**6** Ha'e gui Jerusalém tetã katy huvixa Davi ogueraa ojeupeagua avakue, jebuseu kuery ha'e va'e yvy re ikuai va'e rovai opu'ã aguã. Ha'e ramo Davi pe ha'e pygua kuery aipoe'i okuapy:

– Ndereikei 'rã apy, ára revegua e'ý ha'e oguata e'ý va'e kuery rive teĩ ndejoko rã – he'i okuapy, ojeupe "Davi ndoikei 'rã apy", he'ia rami.

**7** Ha'e rami teĩ Davi oipe'a nho Sião py oo ikorapa va'e. Ha'e va'e pe ma "Tetã Davi rekoa" 'ea.

**8** Mba'eta ha'e va'e ára Davi aipoe'i:

– Jebuseu kuery pejukaxe va'e tapeo yy raperã ita ombokuaague rupi, ha'e vy pejukapa "Ára revegua e'ý ha'e oguata e'ý va'e" 'ea va'e kuery – he'i, mba'eta Davi onhe'ẽ py nda'ija'ei ae ha'e kuery re. (Ha'e nunga rupi aipo'ea: "Ára revegua

e'ŷ ha'e oguata e'ŷ va'e ndoikei 'rã ha'e va'e oo py", 'ea.)

<sup>9</sup> Ha'e rami vy oo ikorapa va'e py Davi ae oĩ, ha'e vy omboery tetã Davi reko. Ha'e va'e yvýry rupi tetã omoatyrõ heravy, Milo guive oikea peve.

<sup>10</sup> Davi ipo'akave tema ovvy, hexeve SENHOR Nhan-deruete ixondaro reta va'e oiko ramo.

### *1 Crônicas 14.1,2*

<sup>11</sup> Davi-a py Tiro pygua huvixa Hirão ombou ayvu mombe'uarã. Ogueru ruka avi yvyra yary, oo apoa kuery ha'e ita re ombo'eapo va'e kuery, Davi rorã ojapo va'erã.

<sup>12</sup> Ha'e ramo Davi oikuaa SENHOR omoĩ atãvea Israel re opena aguã, ojeupegua kuery oayvua rupi ombopo'akave.

### *1 Crônicas 3.5-9; 14.3-7*

<sup>13</sup> Hebrom tetã gui Davi ou rire Jerusalém py ju ojouve gua'yxy jevyrã. Ha'e rã ikuaive ju ta'y ha'e tajy kuery.

<sup>14</sup> Po rami ma Jerusalém py itui'i va'ekue rery: Samua, Sobabe, Natã, Salomão,

<sup>15</sup> Ibar, Elisua, Nefegue, Jafia,

<sup>16</sup> Elisama, Eliada ha'e Elifelete.

### *1 Crônicas 14.8-17*

<sup>17</sup> Filisteu kuery oendu okuapy Davi omoĩa Israel kuery ha'e javi ruvixarã. Ha'e vy oupa ojopy aguã Davi. Ha'e nunga Davi oendu vy ova ju oo ikorapa va'e py.

<sup>18</sup> Ha'e rã filisteu kuery ou vy Refaim yvyugua ha'e javi rupi ijaty.

<sup>19</sup> Ha'e ramo Davi oporandu SENHOR pe. Ha'e vy aipoe'i:

— Taa pa filisteu kuery rovai? Remboaxa 'rā teve xepo py?

SENHOR ombovai:

— Tereo, mba'eta anhetē amboaxa 'rā filisteu kuery ndepo py – he'i.

<sup>20</sup> Ha'e rami rā Baal-Perazim py Davi ou vy oitypa ha'e py. Ha'e vy aipoe'i:

— SENHOR omoaīmba xerovaigua filisteu kuery ryxya xerenonde py ikuai va'ekue, yy mba'emo ogueroxyry heravya rami – he'i. Ha'e nunga rupi ha'e va'e tekua oenoña Baal-Perazim.\*

<sup>21</sup> Ha'e py ma filisteu kuery oejapa oje'oivy ta'angaa oguereko va'ekue. Ha'e rā Davi ha'e avakue hexeve ikuai va'e ogueraapa.

<sup>22</sup> Ha'e gui filisteu kuery ou nho jevy vy ijaty ju okuapy Refaim yvyugua ha'e javi rupi.

<sup>23</sup> SENHOR pe Davi oporandu jevy ramo ombovai:

— Tereo eme. Pembojere 'rā hakykue katy gui, ha'e gui ma ha'e kuery re pepu'ā 'rā amora ikuai va'e guy rupi.

<sup>24</sup> Ha'e gui xapy'a rei rendu 'rā amora rovapy rupi opyrō-pyrō nhendu va'e. Ha'e va'e rendu vy ke ejapura. Ha'e va'e ma neranonde SENHOR ae oo nhendua, filisteu kuery ijaty okuapy va'e jukapaarā – he'i.

<sup>25</sup> SENHOR ojapo ukaa rami Davi ojapo vy ojukapa filisteu kuery Geba guive Gezer py ovaẽa peve.

## 6

### *1 Crônicas 13.5-14*

---

\* <sup>5:20</sup> Tery Baal-Perazim ma “Senhor omoaīmba” 'ea.

<sup>1</sup> Davi ma Israel kuery gui omboatypa ju oiporavo va'ekue ha'e javi, trinta mil avakue.

<sup>2</sup> Oiko katupa ma vy ogueraa ha'e kuery Judá re Baalá oĩ va'e katy, ha'e va'e gui Nhanderuete ayvu ryru ogueru aguã yvy'ã katy. Ha'e va'e re oĩ SENHOR ixondaro reta va'e anjo ipepo va'e kuery ikuai va'e mbyte oĩ va'e rery.

<sup>3</sup> Nhanderuete ayvu ryru ma peteĩ karóxa ipyau va'e áry omoĩ vy ogueru Abinadabe ro yvy'ã re oĩague gui. Ha'e rã Abinadabe ra'y kuery Uzá ha'e Aiô oje'oi karóxa pyau reraarã.

<sup>4</sup> Ha'e rami py Abinadabe ro yvy'ã re oĩague gui ogueru inony Nhanderuete ayvu ryru. Ha'e rã Aiô oo oiny hyru renonde.

<sup>5</sup> Davi ha'e Israel ro pygua kuery ha'e javi ový'a oje'ivy SENHOR renonde rupi, opa marâguia ipu va'e yvyra faia gui ojapo pyre py, ixã reta va'e, mbaraka, angu'a pu'i, pandeiro ha'e hy'a pu py.

<sup>6</sup> Ha'e gui Nacom mba'emo moa'yíaty re ovaẽa py ma Nhanderuete ayvu ryru re Uzá opoko vy omombyta, vaka onhepyxanga rã.

<sup>7</sup> Ha'e ramo Uzá rovai SENHOR poxya hendy vy ha'e pyve ojuka, nomboetei reia re. Ha'e rã omano Nhanderuete ayvu ryru yvy'iry ae.

<sup>8</sup> SENHOR Uzá ojuka rã Davi ndojou porãi. Ha'e vy ha'e va'e tekoa omboery Perez-Uzá, aÿ peve guarã.

<sup>9</sup> Ha'e va'e ára SENHOR gui Davi okyje vy aipoe'i:  
— Mba'exa nda'u SENHOR ayvu ryru aru 'rã? — he'i.

<sup>10</sup> Ha'e rami vy Davi ndogueruxevei SENHOR ayvu ryru guekoa katy. Ha'e rami 'rãgue py Gate guigua Obede-Edom va'e ro katy rive ogueraa uka.

**11** Mboapy jaxy re SENHOR ayvu ryru opyta Gate guigua Obede-Edom ro py. Ha'e rã SENHOR omoingo porã, hoo pygua ha'e javi reve.

*1 Crônicas 15.25-16.3*

**12** Ha'e gui ma Davi pe omombe'ua vy aipo'ea:  
— SENHOR oayvu ryru re vy omoingo porã Obede-Edom ro pygua kuery ha'e mba'emo oguereko va'e ha'e javi — 'ea. Ha'e ramo Davi ov'y'a reve oo vy Obede-Edom ro gui ogueru ruka guekoa katy Nhanderuete ayvu ryru.

**13** SENHOR ayvu ryru rerua kuery mboapy memekue opyrõa py kuerei 'rã SENHOR pe ojuka vaka ha'e vexa'i omongyra pyre.

**14** Davi ojeroky ratã ouvy SENHOR renonde ov'y'a reve. Onhemonde sacerdote pegua manto ajukue pererí'i gui ojapo pyre py.

**15** Ha'e rami vy Israel kuery ha'e javi reve Davi ogueru SENHOR ayvu ryru, ov'y'a reve ha'e mimby guaxu omonhe'ëa rupi.

**16** Tetã Davi rekoa py SENHOR ayvu ryru oguerovaëa ma heruvy jave Saul rajykue Mical janela rupi oma'ë vy oexa oiny SENHOR renonde huvixa Davi ojeroky ha'e opo-opo reve ou rã. Ha'e rami vy opy'a py ojou vai.

**17** Ha'e gui SENHOR ayvu ryru ogueroike vy omoï oo'i hendarã ae ma voi Davi ojapo va'ekue py. Davi ae SENHOR renonde ogueru mba'emo oapy reve ha'e peteï rami ikuaria regua ome'ë va'erã.

**18** Mba'emo oapy reve ha'e peteï rami ikuaria regua Davi ome'ëmba ma rire ogueroayvu porã heta va'e kuery SENHOR ixondaro reta va'e rery rupi.

**19** Ha'e gui ha'e kuery ha'e Israel kuery ha'e javi pe ome'ë tembi'u, avakue ha'e kunhague pe. Peteï-teï

ikuai va'e pe ome'ẽ peteĩ ra'ykue mbojape, peteĩ ra'ykue ja'ea'i xo'o ha'e uva pirukue. Ha'e rire ma ha'e kuery ojepe'apa oje'oviv ngoo katy.

*Mical pe Davi ijayvu eteague*

<sup>20</sup> Davi ngoo pygua kuery ae ogueroayvu porã aguã ojevy jave Saul rajykue Mical oẽ ovaexã aguã. Ha'e vy aipoe'i:

— Ojexa uka porã ete pa Israel pygua huvixa! Ange ojekuaa uka guembiguai kuery rembiguai kunhague pe, oxã e'õ va'e rami ojekuaa uka, ovare'õ va'e rive rami ete.

<sup>21</sup> Ha'e rã Davi ombovai Mical pe:

— SENHOR renonde ae xee ajapo. Ha'e va'e ma xeporavo karamboae nderu ha'e hoo pygua kuery ha'e javi rãgue py, ha'e vy xemoõ uka ojeupegua Israel kuery ruvixarã. SENHOR renonde ae xee avy'a kuri.

<sup>22</sup> Ha'e gui xee ange aikoague gui ndajeayvu ukaive tema 'rã, ha'e anhemo'yvyi've 'rã aikoa py. Ha'e rã tembiguai kunhague ndeayvua va'e ma xemboeteve 'rã okuapy – he'i.

<sup>23</sup> Saul rajykue Mical ma na'imembyi, omanoa ára peve.

## 7

*1 Crônicas 17.1-15*

<sup>1</sup> Ha'e gui huvixa Davi ngoo py ae oĩ jave, hov-aigua kuery jova-jovai re ikuai va'e opu'ãague gui SENHOR omombytu'u ma rire

<sup>2</sup> huvixa aipoe'i profeta Natã pe:

— Ma'ẽ, xee ma xero ainy yary guigua py, ha'e rã hyru Nhanderuete pegua ma peteĩ oo'i py rive oĩ.

<sup>3</sup> Natã ombovai huvixa pe:

— Tereo, ejapo ndeyp'a re rendu va'e ha'e javi, ndereve SENHOR oiko ramo — he'i.

<sup>4</sup> Ha'e gui ha'e va'e pyavyve, Natã pe SENHOR ombou oayvu. Ha'e vy aipoe'i:

<sup>5</sup> — Tereo ha'e aipo're xerembiguai Davi pe: “Po rami SENHOR ijayvu: Ndee ae 'rã teve rejapo peteĩ oo xee aĩ aguã?

<sup>6</sup> Mba'eta neĩ peteĩve oo py ma voi xee naĩ teri Egito yvy gui Israel kuery arupa guive aŷ peve. Ha'e rami 'rãgue py oo'i py rive aiko va'e, xembojerovia aty py ae.

<sup>7</sup> Opa rupi Israel kuery aru herekovya rupi nda'u xeayvu ri raka'e amongue nderegua pe, xevygua Israel kuery re apena uka va'ekue pe nda'u aipoa'e: ‘Mba'e re tu nderejapoi peteĩ xerorã yary guigua?’ ha'e teve?

<sup>8</sup> Ha'e gui aŷ ma po rami 'rã ndeayvu xerembiguai Davi pe: ‘SENHOR ixondaro reta va'e aipoe'i: Xee roiporavo karamboae vexa'i kuery re repenaa gui, ha'e kuery rakykue reikoa gui, huvixarã xevygua Israel kuery re ju repena aguã.

<sup>9</sup> Ndereve xee aa avi karamboae, mamo rã reoa rupi tema. Nderovaigua kuery amomba nerенонде gui, amboyvate guive nderery, yvy regua ipo'akakueve anho ikuiaia rami.

<sup>10</sup> Areko katu avi xevygua Israel kuery rekoarã, ha'e vy amboekoapa ha'e py, mava'eve omoangekoave e'ŷ aguã, ha'e heko vai va'e ombojexavaive e'ŷ aguã jypy guare rami e'ŷ,

<sup>11</sup> xevygua Israel kuery rerekoarã amoña ára guive. Ha'e rami avi ndevy ame'ẽ 'rã nderovaigua kuery opu'ãague gui repytu'u aguã’ ”, he'i va'ekue. SENHOR ma oikuaa uka pova'e: Ha'e ae 'rã ojapo oo

ndevy.\* Aipoe'i:

**12** “Nderekovea opa rã nderu kuery reve reptytu'u ma jave nderekovia xee amoingo 'rã ndeguigua, ndegui ete oiko va'erã. Ha'e vy ajapo 'rã ipo'akaa oĩ atã aguã rami.

**13** Ha'e va'e ae ma ojapo 'rã peteĩ oo xerery oĩ aguã, ha'e rã xee ajapo 'rã raka'e rã peve ipo'aka oiny aguã rami.

**14** Xee ma tuu 'rã, ha'e rã ha'e ma xera'y 'rã oiko. Xapy'a rei ha'e ojejavy ramo ma ambopaga 'rã avakue hyvyra po'i'i py, avakue gua'y kuery om-bopia rami.\*

**15** Ha'e rami teĩ ixugui ndaipe'ai 'rã amboaxya, Saul nerenonde gui aipe'a vy namboaxyveiague rami e'ŷ.

**16** Ha'e rã ndero ha'e ndepo'akaa ma amoĩ atãve 'rã nerenonderã. Ha'e rami vy oĩ riae 'rã ndepo'aka reinya”, he'i.

**17** Ha'e va'e ayvu ha'e javi ma Natã pe oexa ukaague rami ae omombe'u Davi pe.

### *1 Crônicas 17.16-27*

**18** Ha'e gui ma SENHOR pegua opy Davi oike vy hi'aĩ henonde. Ha'e vy aipoe'i:

— SENHOR Xeruete, mba'e nunga tu xee aiko, ha'e mba'e nunga tu xero pygua kuery ikuai, apy peve ndee xereru aguã?

**19** SENHOR Xeruete, ha'e nunga tu ndevy pe mba'e'ŷ rima, ndeayvu ma voi guive xee

\* **7:11** Oo ojapo aguã re SENHOR ijayvu, raka'eve rã Davi ramymimo kuery regua huvixarã omoingo aguã re (versículos 12, 16). Ha'e va'e regua ma Jesus Cristo ae oiko (Lucas 1.32-33,69; Atos 13.23).

\* **7:14** 2 Coríntios 6.18, Hebreus 1.5, Apocalipse 21.7

nerembiguai ro pygua raka'e rā guarā re. SENHOR Xeruete, ha'e nunga ma avakue ha'e javi mo'aranduarā rejapo.

<sup>20</sup> Ha'e gui xee nerembiguai Davi, mba'e ta'eve ju ndevy pe? Mba'eta ndee ma xekuaa porā, SENHOR Xeruete.

<sup>21</sup> Ndeayvua ha'e ndepy'a re rendua rami vy rejapo kova'e nunga tuvixa va'e ha'e javi, xee nerembiguai pe reikuua uka guive.

<sup>22</sup> Ha'e nunga rupi SENHOR Xeruete, ndetuvixa ete va'e, mba'eta ndoikoi ndee ramigua ete'i, ndoikoi guive Oreruete mboae ndee e'ŷ vy, oreapyxa py ae roenduague rami.

<sup>23</sup> Mava'e regua tu ndevygua Israel kuery ikuiaia ramigua? Xeruete, ha'e kuery anho'i ae yvy re ikuai va'e mbyte gui ndejeupe guarā reipe'a va'ekue. Ha'e rami ndejeupe ae rejapo nderery re ima'endu'aa aguā rami, ha'e ndevygua kuery pe rejapo mba'emo porā ete, ndeyvy re guive, mba'eta ha'e gui yvy regua kuery remoxēmba raka'e tuuete ramigua kuery reve, ndevygua kuery Egito yvy gui renoēmba va'ekue renonde gui.

<sup>24</sup> SENHOR, Israel kuery ndejeupe guarā ae remoingo raka'e rā peve, ha'e gui ndee ju renhemoingo Tuuete.

<sup>25</sup> Ha'e gui aŷ ma SENHOR Xeruete, ha'e va'e ayvu xee nerembiguai rekorā re, ha'e xero pygua re guive aipo'reague toĩ atāve, ejapo ndeayvuague rami ae.

<sup>26</sup> Nderery tomboetea riae, ha'e vy “SENHOR ixondaro reta va'e ma Israel kuery Ruete”, ta'ea. Ha'e ramo xee Davi nerembiguai ro ma oĩ atā riae 'rā

nerenonde.

<sup>27</sup> Mba'eta SENHOR ixondaro reta va'e, Israel kuery Ruete va'e, xee nerembiguai pe ha'e nunga reikuua uka vy "Ajapo 'rã oo ndevy", 're va'ekue. Ha'e nunga rupi ae xee nerembiguai xepy'a guaxu nami anhembo'e aguã ndevy.

<sup>28</sup> Ha'e gui aÿ, SENHOR Xeruete, ndee ae ma Oreruete, ha'e ndeayvua ma anhetẽ va'e meme. Ha'e vy xee nerembiguai pe rejapo porã aguã re ndeayvu.

<sup>29</sup> Ha'e nunga rupi aÿ SENHOR Xeruete, emoingo porã xee nerembiguai ro pygua kuery, nerенонде rupi orekuai riae aguã rami, mba'eta ha'e rami aguã re ndeayvu rire. Ha'e rami vy xee nerembiguai ro pygua reroayvu porã rire raka'e rã peve 'rã roiko porã – he'i.

## 8

### *1 Crônicas 18.1-13*

<sup>1</sup> Ha'e rire ma Davi filisteu kuery oitypa vy ipo'aka ha'e kuery re. Ha'e kuery po gui oipe'a avi hetã tuvixakueve re ipo'aka aguã.

<sup>2</sup> Oitypa avi Moabe pygua kuery. Ha'e rami vy yvy rupi omonhenomba vy oa'ã: mokoõ ixã'i oa'ãgue ma ojuka aguã rami ikuai, ha'e rã peteõ ixã'i oa'ãgue ma ndojukai. Ha'e rami vy Moabe pygua kuery ikuai Davi rembiguairã, ha'e ixupe mba'emo opaga jepi 'rã okuapy.

<sup>3</sup> Ha'e gui Zobá pygua huvixa Reobe ra'y Hadadezer ma yakã Eufrates re ipo'aka ju aguã oo jave hexe voi Davi ipo'aka.

<sup>4</sup> Ixupegua kavaju árygua kuery ma Davi ojopy mil e setecentos, ha'e gui vinte mil avakue yvy

rupigua. Ojayapa guive kavaju karóxa regua py-taxã, cem ete'i oeja ojaya e'ŷ re.

<sup>5</sup> Ha'e ramo Síria pygua kuery ma Damasco tetã gui ou Zobá pygua huvixa Hadadezer repyarã. Ha'e rami teĩ ha'e va'e avakue Síria guigua ma Davi ojuka vinte e dois mil.

<sup>6</sup> Ha'e gui Damasco regua Síria py Davi omoĩ harõarã kuery. Ha'e ramo Síria pygua kuery Davi rembiguairã ikuai vy mba'emo opaga 'rã okuapy ixupe. Davi ooa nhavõ rupi SENHOR ombopo'akave tema.

<sup>7</sup> Hadadezer rembiguai yvatekueve hu'y jokoa ouro guigua oguereko va'ekue Davi ojopy vy oguerupa Jerusalém py.

<sup>8</sup> Hadadezer pegua tetã Betá ha'e Berotai gui voi huvixa Davi oipe'ave tema overa va'e guigua.

<sup>9</sup> Ha'e gui Hamate pygua huvixa Toí oendu Hadadezer pegua xondaro kuery Davi oitypaague.

<sup>10</sup> Ha'e rami vy huvixa Davi-a py ombou gua'y Jorão. Ha'e va'e ma oxarura vy oguerovy'a Hadadezer reve joguero'aa py ojukapaague re (mba'eta Toí reve Hadadezer joguero'a tema rire). Jorão ou vy ogueru mba'emo prata, ouro ha'e overa va'e guigua ome'ẽ va'erã.

<sup>11</sup> Ha'e nunga huvixa Davi ojopy vy omboaxapa SENHOR peguarã, ha'e javi regua re ipo'akaague va'e kuery gui prata ha'e ouro ojopy va'ekue reve:

<sup>12</sup> Síria guigua, Moabe regua, Amom ra'y kuery, filisteu kuery, Amaleque ha'e Zobá pygua huvixa Recabe ra'y Hadadezer mba'e rei-rei guigua guive.

<sup>13</sup> Síria pygua kuery Davi oitypaague gui ou vy

“Ju<sup>k</sup>ky yvyugua” 'ea va'e py dezoito mil avakue ju ojuka. Ha'e rami rā Davi rery re ima'endu'aa opa rupi.

<sup>14</sup> Edom re voi omoī harōarā kuery. Edom ha'e javi rupi omoī harōarā. Ha'e ramo Edom pygua kuery ha'e javi ikuai Davi rembiguairā. Davi ooa nhavō rupi SENHOR ombopo'akave tema.

*2 Samuel 20.23-26; 1 Crônicas 18.14-17*

<sup>15</sup> Ha'e rami vy Davi opena Israel kuery ha'e javi re. Joe oikuua potaa py ha'evea rami oguerek ojeupegua kuery.

<sup>16</sup> Ixupegua xondaro kuery ruvixa ma Zeruia pi'a Joabe. Mba'emo oiko va'ekue mboparaa ma Ailude ra'y Josafá.

<sup>17</sup> Sacerdote ma Aitube ra'y Zadoque, ha'e gui Abiatar ra'y Aimeleque. Ha'e rā kuaxia re opena va'ety ma Seraías.

<sup>18</sup> Huvixa ro rarōa kuery ruvixa ma Joiada ra'y Benaia. Ha'e rā Davi pytyvōa kuery ma ta'y kuery ae.

## 9

*Jônatas ra'ykue re Davi opena porāague*

<sup>1</sup> Davi aipoe'i:

— Oikove teri teve Saul ro pygua kuery va'e regua, Jônatas ayvua rupi xee apena porā aguā? — he'i.

<sup>2</sup> Saul ro py oiko raka'e peteī hembiguai Ziba hery va'e. Ha'e va'e oenoī ukaa Davi-a py oo aguā. Davi oporandu ixupe:

— Ndee pa Ziba?

Ombovai:

— Xee ae ri, nerembiguai aiko — he'i.

**3** Huvixa aipoe'i:

— Ndoikovei ma teve Saul ro pygua Nhan-deruete porayvua rami apena porā aguā?

Ziba ombovai huvixa pe:

— Oiko teri peteī Jônatas ra'ykue, opy joavaive oiporu ve'ŷ va'e – he'i.

**4** Huvixa oporandu:

— Mamo ha'vy oĩ?

Ziba ombovai:

— Amiel ra'y Maquir ro py ko oĩ, Lo-Debar py – he'i.

**5** Ha'e ramo Lo-Debar gui huvixa ogueru ruka Amiel ra'y Maquir ro gui.

**6** Davi-a py Saul ra'y Jônatas ra'ykue Mefibosete ou vy guenapy'ã re oĩ, ngova yvy re omovaẽ reve. Ixupe Davi aipoe'i:

— Mefibosete!

Ombovai:

— Apy ma nerembiguai aiko! – he'i.

**7** Ha'e gui Davi aipoe'i:

— Ekyje eme, mba'eta nderu Jônatas ayvua rupi apena porā 'rā ndere. Ha'e vy ndevy ame'ẽmba 'rā neramoĩ Saul yvykue ha'e javi. Ha'e rã ndee ma rekaru riae 'rā xe-mesa py.

**8** Ha'e ramo ojero'a ju reve aipoe'i:

— Mba'e tu xee nerembiguai aiko, jagua re'õgue rami xee aiko va'e re rema'ẽ aguā? – he'i.

**9** Ha'e gui Davi oenoĩ uka ju Saul rembiguai Ziba. Ha'e vy aipoe'i ixupe:

— Saul mba'e va'ekue ha'e imba'e rei-reikue ha'e javi ma amboaxa ange nepatõ ra'ykue pe.

**10** Pemba'eapo 'rā ijyvy re, ndera'y kuery ha'e nerembiguai kuery reve. Ha'e vy mba'emo aju

pemono'õ kuerei 'rã, nepatõ rogue py oĩ aguã pe'u va'erã. Ha'e rã nderuvixa ra'ykue Mefibosete ma xe-mesa py riae 'rã okaru — he'i. Ziba ra'y kuery ikuai raka'e quinze, ha'e gui hembiguai kuery ma vinte.

<sup>11</sup> Ziba aipoe'i huvixa pe:

— Xeruvixa, xee nerembiguai pe rejapo uka va'e ha'e javi 'rã ajapo — he'i. Ha'e rami vy Mefibosete okaru oikovy Davi mesa py, huvixa ra'y kuery rami ae avi.

<sup>12</sup> Mefibosete ra'y kyrĩ'i va'e rery ma Mica. Ziba ro py ikuai va'e ma Mefibosete rembiguai meme raka'e.

<sup>13</sup> Mefibosete ma Jerusalém tetã py hekoa raka'e, huvixa mesa py ae tema okaru vy. Ha'e ma opy jovaive oiporu ve'ŷ va'e.

## 10

### *1 Crônicas 19.1-19*

<sup>1</sup> Ha'e rire ma Amom ra'y kuery ruvixa omano, ha'e rã ta'y Hanum ju oĩ nguu rekovia.

<sup>2</sup> Ha'e ramo Davi aipoe'i:

— Naás ra'ykue Hanum pe aexa uka 'rã ayyua, tuu xerayvuague rami — he'i. Ha'e rami vy Davi omondouka guembiguai kuery ombopy'a porã ju aguã tuu omanoague gui. Ha'e rã Davi rembiguai kuery ovaẽ Amom ra'y kuery yvy re.

<sup>3</sup> Ha'e rami teĩ Amom regua yvatekueve aipoe'i okuapy nguvixa Hanum pe:

— Rexa'ã teve Davi nderu rãgue'i omboetea rupi guembiguai ombou nembopy'a porãarã? Xapy'a rei ma ndea py merami guembiguai kuery ombou vy neretã re oikuaa pota ha'e yvy re oexa pota rire ombovaipa aguã e'ŷ teve? — he'i okuapy.

<sup>4</sup> Ha'e rami rã Hanum ojopy Davi rembiguai kuery, ha'e vy onhopõmba hendyva ijykekue'i rupi, ijao ojaya guive hevi ro'o ojekuaa peve. Ha'e rire mae ma omondouka ju.

<sup>5</sup> Ha'e nunga Davi oikuua vy ombou ayvu mombe'uarã ha'e kuery ovaexi aguã, omoxõmbaa rire. Huvixa aipoe'i uka:

— Pepyta ranhe Jericó tetã py, penerendyva ipukupa ju peve. Ha'e rire ma peju ju — he'i uka.

<sup>6</sup> Amom ra'y kuery oikuuaa okuapy Davi nda'ija'evei aguã rami ojapoague. Ha'e vy omondouka ayvu mombe'uarã vinte mil Síria pygua avakue ogueru aguã Bete-Reobe ha'e Zobá gui, ha'e gui mil avakue Maaca pygua huvixa pegua, ha'e doze mil ju Tobe gui ogueru aguã.

<sup>7</sup> Ha'e nunga Davi oendu vy ha'e kuery rovai ombou Joabe oxondaro kuery ha'e javi reve, ipy'a guaxukueve meme.

<sup>8</sup> Amom ra'y kuery oje'oi vy tetã kora rokẽ py oarõ okuapy joe opu'ã aguã. Ha'e rã Síria pygua kuery Zobá ha'e Reobe guigua ma amboae rupi ranhe ikuai nhuñdy rupi, avakue Tobe ha'e Maaca guigua kuery reve.

<sup>9</sup> Ha'e gui Joabe oexa hovaigua kuery henonde ha'e hakykue katy gui oarõ okuapya, ha'e rami vy Israel kuery ikuai va'e gui opu'ã kuaave va'e oiporavo vy omboyxy imbokuapy Síria pygua kuery rovai.

<sup>10</sup> Ha'e rã hembyrekue ma guyvy Abisai po py omboaxa. Ha'e ramo ha'e va'e ma Amom ra'y kuery rovai ju omboyxy imbokuapy.

<sup>11</sup> Ixupe Joabe aipoe'i:

— Xapy'a rei Síria pygua kuery xegui imbaraeteve ramo ndee reo 'rã xepytyvõ aguã. Ha'e rã Amom ra'y kuery ri ndegui imbaraeteve ramo xee aju 'rã roipytyvõ vy.

<sup>12</sup> Nhanembaraete ke ha'vy. Jajoguero'a nhan-depy'a guaxua rupi nhaneretarã kuery ha'e Nhan-deruete pegua tetã ikuai va'e jaepya rupi. Ha'e SENHOR tojapo ojou porãa rami – he'i.

<sup>13</sup> Ha'e vy Joabe guexeveguia kuery ogueraa vy joguero'a okuapy Síria pygua kuery reve. Ha'e rã ha'e va'e kuery onhamba henonde gui.

<sup>14</sup> Ha'e rã Síria pygua kuery onhamba maa Amom ra'y kuery oexa vy ha'e kuery voi onhamba avi Abisai renonde gui, ha'e vy guetã py ju oikepa. Ha'e ramo Joabe ma Amom ra'y kuery reve joe opu'ãague gui ojevy vy oopa ju Jerusalém katy.

<sup>15</sup> Ha'e gui Síria pygua kuery ma Israel kuery renonde oitypaa oexa vy ono'õmba ju.

<sup>16</sup> Hadadezer ogueru rukave ju Síria pygua kuery yakã rovai re ikuai va'ekue, ha'e rã ha'e va'e kuery ma Helã tetã py ou. Ha'e kuery renonde ou oiny Sobaque, Hadadezer pegua xondaro kuery rerekooarã.

<sup>17</sup> Ha'e nunga Davi pe omombe'ua rã oendu vy omboatypa Israel kuery ha'e javi, ha'e vy Jordão yakã oaxa vy Helã katy oje'oi. Síria pygua kuery oarõ okuapy Davi kuery rovai joguero'a aguã, ha'e vy joguero'a ha'e kuery reve.

<sup>18</sup> Ha'e rami teĩ Israel kuery renonde gui Síria pygua kuery onhamba ju. Ha'e ramo Davi ojuka Síria pygua kuery va'e regua setecentos karóxa pygua ha'e quarenta mil kavaju árygua. Oipyxo avi xondaro kuery rerekooa Sobaque, ha'e rami rã ha'e

pyve omano.

<sup>19</sup> Hadadezer rembiguai kuery huvixa ikuai va'e oitypa maa oexa okuapy vy ojapo Israel kuery reve ikuai porã ju aguã, ha'e kuery rembiguai ikuai aguã. Ha'e rami rire Síria pygua kuery okyje vy noipytyvõxevei Amom ra'y kuery.

## 11

### *Bate-Seba reve Davi itavyague*

<sup>1</sup> Peteĩ ma'etÿa ma rire huvixa kuery joguero'a vy oopa jepi jave Davi omondouka Joabe guembiguai kuery ha'e Israel kuery ha'e javi. Ha'e ramo ha'e kuery oitypa Amom ra'y kuery, ojokopa okuapy guive hetã Rabá. Ha'e rã Davi ma Jerusalém py ae opyta.

<sup>2</sup> Peteĩgue ka'aru rai jave Davi ngupa py ituia gui opu'ã vy oiko-iko rei ngoo áry rupi. Ha'e vy oexa peteĩ kunha ojau rã, iporã raxa va'e.

<sup>3</sup> Davi oporandu uka mava'e paa re. Ha'e rã ombovaia:

— Bate-Seba ri, Eliã rajy ha'e heteu regua Urias ra'yxy va'e — 'ea.

<sup>4</sup> Ha'e ramo Davi omondouka guembiguai kuery ogueru aguã. Ha'e ou ramo onheno hexeve. Ha'e ramo kunha va'e ma ha'eve'ÿague gui ojeky'a'o ma vy ngoo katy ju ojevy.

<sup>5</sup> Kunha va'e oguereko'i vy Davi pe

— Areko'i ma — he'i uka.

### *Davi Urias ogueru ruka jave guare*

<sup>6</sup> Ha'e ramo Davi omondouka ayvu mombe'ua Joabe pe. Ha'e vy aipoe'i uka:

— Embou ke xea py heteu regua Urias — he'i ramo Davi-a py Joabe ombou Urias.

<sup>7</sup> Davi-a py Urias ou rā ixupe oporandu mba'exa pa Joabe oikoa re, ha'e kuery ikuaria re ha'e joguero'a okuapya re.

<sup>8</sup> Ha'e gui ma Davi aipoe'i Urias pe:  
— Tereo ndero py epytu'u — he'i.

Davi ro gui Urias oo ramove'i ixupe huvixa ogueraa uka mba'emo ome'ẽ rive va'e.

<sup>9</sup> Ha'e rami teĩ Urias ma huvixa ro rokẽ py rive onheno, nguvixa rembiguai kuery ha'e javi reve. Ha'e vy ngoo katy ndooi.

<sup>10</sup> Davi pe omombe'ua vy  
— Urias tu ndooi ma ngoo katy — 'ea.  
Ha'e ramo Davi aipoe'i Urias pe:  
— Mombyry gui e'ŷ teve rejuven? Mba'e re tu ndereoi ndero katy?

<sup>11</sup> Urias ombovai:  
— Lei ryru ha'e Israel ha'e Judá kuery ma oguy'i py rive opytapa teri okuapy. Xepatõ Joabe ha'e nerembiguai kuery ha'e javi ma ijaty okuapy oka py rive. Ha'e rā xee teve aike ta xero py akaru ha'e ay'u aguã, ha'e xera'yxy reve anheno aguã? Anhetẽ ete nderekove rupi aura vy aipoa'e: Xee ndajapoi 'rā ha'e nunga — he'i.

<sup>12</sup> Ha'e ramo Davi aipoe'i Urias pe:  
— Epytave'i ranhe aŷ ete'i ri jepe, ha'e vy ko'ẽ ramo romondouka ju aguã — he'i ramo ha'e va'e ára pukukue re Urias oiko Jerusalém tetã py, ko'ëgue peve.

<sup>13</sup> Davi oenoĩ vy hexeve okaru ha'e oy'u, omonga'u guive. Ka'aru'i ma jave Urias oo ngupa py onheno

aguā nguvixa rembiguai kuery reve, ha'e rā ngoo katy ma ndooi ae.

*Urias omanoague*

<sup>14</sup> Aje'ivekue, kuaxia para Joabe pe Davi ojapo vy Urias po py ogueraa ulka.

<sup>15</sup> Kuaxia para re aipoe'i imoiny:

— Emondouka Urias pavē renonde joguero'avea py. Ha'e vy peja ha'e ae'i, ojukaa aguā — he'i.

<sup>16</sup> Ha'e ramo tetā Joabe kuery ojoko imoinya py omondouka Urias avakue imbaraetekueve reve joe opu'ā aguā py.

<sup>17</sup> Avakue tetā py ikuai va'e oẽ vy Joabe kuery reve joguero'a okuapy ramo Davi rembiguai kuery va'e regua amongue ho'a. Heteu regua Urias omano avi.

<sup>18</sup> Ha'e ramo imombe'uarā Joabe ombou vy Davi pe omombe'u joguero'aa py oiko va'ekue ha'e javi.

<sup>19</sup> Ayvu mombe'ua pe ijayvu imondovy vy aipoe'i:

— Xapy'a rei joguero'aa oiko va'ekue remombe'upa rā

<sup>20</sup> ha'e ivai vy aipoe'i 'rā ndevy: “Mba'e re tu tetā vvy'iry ete ri pejoguero'a? Ndapeikuaai ri ty'y tetā kora gui omombo 'rāa?

<sup>21</sup> Mba'exa tu ojukaa raka'e Jerubesete ra'y Abimeleque? Peteī kunha va'e e'ŷ teve kora áry gui hexe omombo ita, ha'e va'e gui ae omano raka'e Tebes py?” he'i ramo ndee ju “Omano avi nerembiguai heteu regua Urias” 're 'rā — he'i.

<sup>22</sup> Ha'e ramo ayvu mombe'ua oo vy ovaẽ, ha'e Davi pe omombe'upa Joabe aipoe'i ukaague.

<sup>23</sup> Ha'e vy ayvu mombe'ua aipoe'i Davi pe:

— Anhetē, ha'e va'e avakue ma oregui ipo'akave vy nhuñhya rupi ou orerovai. Teĩ ore kuery roo avi ha'e kuery rovai, tetã kora rokẽ py oikea peve. <sup>24</sup> Ha'e ramo hu'y revedua kuery ikora yvatea gui nerembiguai kuery rovai omombo ramo amongue'i omano ndee xeruvixa rembiguai kuery. Ha'e gui omano avi nerembiguai heteu regua Urias.

<sup>25</sup> Davi aipoe'i ayvu mombe'ua pe:

— Po rami 'rã aipo're Joabe pe: “Ndepy'a vai eme ha'e nungakue re, mba'eta kyxe py jojuka 'rãe joguero'aa py. Pejoguero'ave tema tetã rovai ha'e peitypa”, 're 'rã. Po rami 'rã rembopy'a guaxu Joabe — he'i.

### *Bate-Seba re Davi omendaague*

<sup>26</sup> Ha'e gui Urias ra'yxy ma ome omanoa oendu vy ojae'o.

<sup>27</sup> Ojae'o vaipa ma rire Davi ogueru ruka rã herua hoo py. Ha'e rã ta'yxy ju ma oiko vy oguerekopeteĩ kyrĩ va'e. Ha'e rami teĩ Davi ojapo va'ekue ma SENHOR pe nda'evei va'e.

## 12

### *Davi pe Natã ijayvuague*

<sup>1</sup> Davi-a py SENHOR ombou profeta Natã. Ha'e py Natã ovaẽ vy aipoe'i ixupe:

— Peteĩ tetã py ma je oiko mokoĩ avakue. Peteĩ je oguerekopa va'e, ha'e rã amboae ma je ipori- aukue'i.

<sup>2</sup> Oguerekopa va'e ma vixa'i ha'e vaka kuery heta oguerekopet.

<sup>3</sup> Ha'e rā iporiaukue'i va'e ma je mba'eve ndoguerekoi, peteĩ vexa ra'y'i ojogua va'ekue ombotuvixa va'e e'ŷ vy. Ha'e va'e ma hoo py tuvixa'i ta'y kuery reve. Ha'e kuery reve okaru, ha'e kuery karo gui oy'u guive. Ijyva áry oke ramo guajy rami oguerekko.

<sup>4</sup> Ha'e gui oguerekopa va'ea py peteĩ ovaẽ mom-byry gui ou va'ekue. Ha'e ramo ha'e va'e ndojukaxeい guymba kuery vexa'i ha'e vaka ae, mom-byry gui ou va'ekue omongaru aguã. Ha'e rami 'rāgue py ojopy iporiaukue'i va'e rymba vexa'i, ha'e vy ae omongaru ava ovaẽ va'ekue – he'i.

<sup>5</sup> Ha'e ramo Davi ivai raxa ava ha'e rami ete joapo va'ekue pe. Ha'e vy aipoe'i Natā pe:

— Anhetē ete SENHOR oikove va'e rery rupi aura vy aipoa'e: Ava ha'e rami joapo va'ekue ma ojukaa ramo 'rā ha'eve.

<sup>6</sup> Ha'e vexa ra'y'i ojuka va'ekue rekovia ma irundy ju 'rā ome'ẽ, nhomboaxyo rupi e'ŷ ojapo rire – he'i.

<sup>7</sup> Ha'e ramo Natā ombovai Davi pe:

— Ha'e va'e ava ma ndee ae. Po rami SENHOR Israel kuery ruete ijayvu: Xee roiporavo va'ekue Israel kuery ruvixarã, Saul po gui rogueraa jepe guive.

<sup>8</sup> Ndevy ame'ẽ nderuvixa rokue, ha'e ndejyva py amboaxa ta'yxykue ha'e javi. Ndevy amboaxa avi Israel ha'e Judá kuery. Ha'e rā ha'e nunga mboapy'i raka'e va'e rire mba'emo ame'ẽ retave heravy 'rāgue ndevy.

<sup>9</sup> Mba'e re tu nderexarai ri SENHOR ijayvua gui, mba'emo vai rei rejapo vy? Mba'eta heteu regua Urias ma rejuka uka kyxe py. Ha'e gui ta'yxykue

ma ndera'yxyrā rejopy, Amom ra'y kuery kyxe py ime rejuka uka rire.

**10** Ha'e rami rire aŷ guive ndero py ndoiko e'ŷi 'rā kyxe jojukaarā, mba'eta xereja vy heteu regua Urias ra'yxy reraa rire.

**11** — Po rami SENHOR ijayvu: Ma'ẽ, ndero gui ae amoingo 'rā mba'emo vai nde'áry, ha'e vy ndee ae rexaa py ajopy ukapa 'rā ndera'yxy kuery, neirũ pe ju 'rā amboaxa. Ha'e va'e ae ju 'rā onheno ha'e kuery reve, ára porã rei jave.

**12** Mba'eta ndee ma nhemi rupi rejapo, ha'e rā xee ma ha'e nunga ajapo 'rā Israel kuery ha'e javi oexaa py, kuaray rexakāa py ae – he'i.

**13** Ha'e rami rā Davi aipoe'i Natā pe:

— Ajeavy raka'e SENHOR pe.

Natā ombovai Davi pe:

— SENHOR ndeperdoa rejavyague gui. Ndee ma neremanoi 'rā.

**14** Ha'e rami avi rejapo vaiague káuxa ma SENHOR rovaigua kuery ijayvu rei okuapy. Ha'e gui ndera'y oiko rire omano 'rā – he'i.

**15** Ha'e gui ma Natā oo ju ngoo katy.

### *Bate-Seba pi'a omanoague*

Ha'e gui SENHOR omoingo axy Davi ra'y'i Urias ra'yxykue oguerekó va'ekue. Ha'e rā kyrī va'e imba'eaxy vaipa.

**16** Kyrī va'e re Davi ojapukai Nhanderuete pe. Okaru e'ŷ re guive oiko, ha'e pytū mbukukue oaxa oupy yvy rupi ipukupa reve.

**17** Ha'e ramo nhomongeta va'ety kuery hoo py ikuai va'e onhemboja okuapy hexe, yvy gui

omopu'āxe vy. Ha'e rā ha'e ma nopu'āxei, ha'e kuery reve ndokaruxei guive.

<sup>18</sup> Sete araa py ma kyrī va'e omano. Ha'e rā hembiguai kuery okyje okuapy kyrī va'e omano maa Davi pe omombe'u aguā, mba'eta ha'e kuery aipoe'i okuapy:

— Ma'ē, kyrī va'e oikove'i teri reve nhandeayvu ramo noendu potai. Mba'exa 'rā tu kyrī va'e omano maa nhamombe'u ramo? Mba'eta ipori- auve ju 'rā — he'i okuapy.

<sup>19</sup> Davi ma hembiguai kuery joupe-upe ijayvu mbegue rā oexa vy oikuua kyrī va'e omano maa. Ha'e vy oporandu guembiguai kuery pe:

— Kyrī va'e pa omano ma ra'e?

Ha'e kuery ombovai:

— Omano ma — he'i.

<sup>20</sup> Ha'e ramo Davi opu'ā ju yvy gui. Ojau, on-hemoatyro ha'e oao omboekovia ma vy SENHOR pegua opy oike vy omboete. Ha'e gui ma ngoo katy ju ou vy ojerure tembi'u oguerua aguā re. Henonde omoña rā ho'u.

<sup>21</sup> Hembiguai kuery aipoe'i okuapy:

— Mba'e tu rejapo? Kyrī va'e oikove'i teria ja ma rekaro e'ŷ re reiko, rejae'o guive. Va'eri omano ma rire revy vy mbojape guive re'u reiny.

<sup>22</sup> Ombovai:

— Kyrī va'e oikove'i teria ja rima akaru e'ŷ re aiko, ajae'o guive, mba'eta aipoa'e vy: “SENHOR xemboaxy nho rivyvyi gui, ha'e rā pa kyrī va'e oikove tema 'rā?” ha'e va'ekue.

<sup>23</sup> Ha'e gui aŷ ma omano ma rire mba'e re 'rā'vy akaru e'ŷ re aiko? Xee nda'u amoingove ju 'rā

teve? Xee aa 'rã ha'e oĩa py, teĩ ha'e ma ndou jevyvei 'rã xevy – he'i.

<sup>24</sup> Ha'e gui ma Bate-Seba oĩa py Davi oo vy ijayvu porã'i, hexeve onheno guive. Ha'e ramo oguereko'i peteĩ ava'i. Ha'e va'e ma Davi omboery Salomão. Ha'e rã SENHOR voi oayvu.

<sup>25</sup> Profeta Natã po py Davi omoĩ ramo oenoĩ Je-didias, SENHOR oayvu ramo.\*

### *1 Crônicas 20,1-3*

<sup>26</sup> Ha'e ramia ja Joabe kuery joguero'a teri Amom ra'y kuery retã Rabá rovai, ha'e vy ipo'aka okuapy huvixa rekoa oĩ va'e re.

<sup>27</sup> Ha'e ramo Davi-a py Joabe ombou ayvu mombe'ua aipoe'i va'erã: “Rabá rovai ajoguero'a vy xepo'aka ma yy tetã pygua kuery oy'u aguã va'ekue re.

<sup>28</sup> Ha'e gui aŷ ma emono'õve ju ndejeupegua kuery mboae, ha'e pejoko tetã pendepo'aka peve, xee ae xepo'aka ramo xerery rupi oenoĩa e'ŷ aguã”, he'i uka.

<sup>29</sup> Ha'e ramo Davi amboae kuery ha'e javi omono'õmba vy Rabá tetã katy oje'oi. Ha'e va'e tetã rovai joguero'a vy ipo'aka.

<sup>30</sup> Ha'e pygua huvixa akã gui omboi coroa. Ha'e va'e re ouro oĩ va'e poyia ma trinta e três quilo rivyvyi, ha'e va'e re oĩ avi ita hepykueve va'e. Ha'e gui Davi akã re ju omoĩa. Ha'e va'e tetã gui ogueraa reta mba'emo.

<sup>31</sup> Ha'e py ikuai va'ekue ogueraa avi vy omomba'eapo yvyra ayaa py, picareta ha'e haxa

\* **12:25** Salomão ma hery mokoĩ va'e. Tery Jedidias ma “SENHOR rembiayvu” 'ea. Ha'e rã tery Salomão ma “Joguereko porã'i va'e” 'ea.

ferro guigua py, ha'e gui yvy jykue apoa py. Ha'e rami Davi ojapo Amom ra'y kuery retā ha'e javi re. Ha'e gui heta va'e kuery ha'e javi reve Davi ojevy ju Jerusalém katy.

## 13

### *Amnom gueindy reve itavyague*

<sup>1</sup> Davi ra'y Absalão oguereko raka'e gueindy iporā vaipa va'e, Tamar hery va'e. Ha'e va'e re ma Davi ra'y mboae Amnom va'e opena rei.

<sup>2</sup> Amnom nda'evei oiko gueindy Tamar re, imba'eaxy peve, teĩ kunha va'e ma avakue oikuaa va'e'ŷ teri ramo haxy ete ha'e nunga ojapo aguã.

<sup>3</sup> Amnom oguereko peteĩ oirũ, Davi ryvy Siméia ra'y, Jonadabe hery va'e. Jonadabe ma oiko kuaa rei va'e.

<sup>4</sup> Ha'e va'e aipoe'i Amnom pe:

— Mba'e re tu ko'ẽ nhavõ ne'angaise reovy? Neremombe'uxei teve xevy?

Ha'e ramo Amnom onhemombe'u:

— Ayvu xeryvy Absalão reindy Tamar – he'i.

<sup>5</sup> Jonadabe aipoe'i ixupe:

— Enheno nderupa py, enhemomba'eaxy merami ejupy. Nderu ndepou vy ou ramo aipo're: “Ajerure xereindy Tamar ou vy mbojape ome'ẽ aguã, mba'eta tembi'u ojapo rã aexa vy ha'u 'rã ipo gui”, 'rã 'rã – he'i.

<sup>6</sup> Ha'e ramo Amnom onheno vy onhemomba'eaxy oupy. Huvixa oipou vy ou rã Amnom aipoe'i ixupe:

— Ajerure xereindy Tamar ou vy tojapo mokoĩ mbojape aexaa py, ipo gui ha'u aguã – he'i.

<sup>7</sup> Ha'e ramo Davi aipoe'i uka Tamar pe ngoo py oña py:

— Tereo ndekyvy Amnom ro py, ejapo tembi'u ixupe – he'i.

<sup>8</sup> Okyvy Amnom ro py Tamar ovaẽ rã onheno oupy. Kunha va'e trigo apomo ogueru vy mbojape ojapo, ha'e vy ombojy oexaa py.

<sup>9</sup> Oexya renda oguerova ixupe teĩ Amnom ndo'uxei. Ha'e rami 'rãgue py aipoe'i:

— Tojepo'apaa xea gui – he'i. Ha'e ramo ha'e javive ojope'apa.

<sup>10</sup> Ha'e gui ma Amnom aipoe'i gueindy Tamar pe:

— Eru tembi'u xerupa py, ha'e ramo ha'u 'rã ndepo gui – he'i ramo Tamar mbojape ojapo va'ekue ogueru okyvy Amnom rupa okeaty peve.

<sup>11</sup> Ome'ẽ ramove ojopy kunha va'e jyva re, ha'e vy aipoe'i:

— Xereindy, eju, enheno xereve – he'i.

<sup>12</sup> Ha'e rami teĩ kunha va'e ombovai:

— Any xekyvy, enhea'ã rei eme, mba'eta Israel re ma namigua ojapoa va'e'ŷ. Ejapo eme mba'emo vai.

<sup>13</sup> Mamo 'rã tu aa aximba reve? Ha'e rã ndee ma Israel kuery ndekuaa 'rã inhakã porã e'ŷ va'e rami. Aŷ ma ajerure huvixa reve ndeayvu aguã re. Ha'e ma naxeme'ẽ e'ŷi 'rã ndera'yxyrã – he'i.

<sup>14</sup> Ha'e rami teĩ ikyvy noendu potai kunha va'e ijayvua re. Ha'e imbaraeteve vy onhea'ã rei vy nhogueronheno kunha va'e reve.

<sup>15</sup> Ha'e rire Amnom oendu nda'ija'evei etea, jypy oayvuague rami e'ŷ. Ha'e vy Amnom aipoe'i ixupe:

— Epu'ã, tereo ju.

<sup>16</sup> Ha'e ramo kunha va'e ombovai:

— Any, xekyvy. Xemondouka rive jevy va'e rire jypy xere rejapo va'ekue gui nda'eveive 'râgue — he'i.

Ha'e rami teĩ ikyvy noendu potai vy

<sup>17</sup> guembiguai kunumi va'e oenoĩ vy aipoe'i:

— Emoẽ kunha va'e oka py, ha'e gui emboty okẽ — he'i.

<sup>18</sup> Ha'e ramo hembiguai kunumi va'e oka py omoẽ vy omboty okẽ.

Tamar ma ao ijyva puku va'e py onhemonde, huvixa rajy kuery kunhatai'i va'e onhemondea rami.

<sup>19</sup> Ha'e gui tanhimbu ojopy vy omoĩ oakã re, omon doropa oao ijyva puku va'e onhemondea, ha'e vy oakã re opo omoĩ reve ojepe'a. Ojae'o atã ovy.

<sup>20</sup> Ha'e gui ikyvy Absalão ju oexa vy aipoe'i ix up:

— Ndekyvy Amnom teve oĩ ra'e ndereve? Ma'ẽ xereindy, ekyrirĩ ma'vy. Ndekyvy ranga oiko. Ndepy'a vai eme ha'e nungakue re — he'i. Ha'e rami rire Tamar iporiau vaipa reve okyvy Absalão ro py ju oiko.

<sup>21</sup> Huvixa Davi ha'e nunga ha'e javi oendu vy ivai.

<sup>22</sup> Ha'e rã Absalão ma guyke'y Amnom reve nda'ijayvu porãi neĩ nda'ijayvu vai guive, gueindy Tamar re onhea'ã reiague re.

### *Guyke'y Amnom Absalão ojuka ukaague*

<sup>23</sup> Mokoĩ ma'etõa ma oaxa rire Absalão ojaya oikovy guymba kuery vexa'i rague Baal-Hazor py,

Efraim katy'i oĩ va'e py. Ha'e vy Absalão oenoĩ uka huvixa ra'y kuery ha'e javi ha'e py ou aguã.

**24** Ha'e vy huvixaa py Absalão oo vy aipoe'i ixupe:

— Ma'ẽ, xee nerembiguai ajaya aikovy vexa'i rague. Xeruvixa, ajerure reo aguã nerembiguai kuery reve.

**25** Ha'e rami teĩ huvixa ombovai:

— Any xera'y, ndorooi 'rã jojavi, ndevy pe mba'emo oata e'ŷ aguã — he'i. Ta'y Absalão oguer-aaxea rami ijayvu tema va'eri ndooxei. Ha'e rami teĩ ogueroayvu porã.

**26** Ha'e rami rã Absalão aipoe'i:

— Ndee ndereoxei teĩ xeryke'y Amnom ri jepe emondouka orereve.

Huvixa oporandu:

— Mba'erã tu ha'e oo 'rã ndereve? — he'i ramo

**27** Absalão onhea'ã rei tema. Ha'e ramo huvixa omondouka nho Amnom, gua'y kuery ha'e javive reve.

**28** Ha'e gui Absalão ma guembiguai kunumigue pe ijayvu vy aipoe'i:

— Peikuua pota rei ke. Amnom vinho gui oka'u vaipa ma vy ov'a rei jave pendevy “Pejuka ke Amnom” ha'e ramo pejuka. Pekyje eme. Xee e'ŷ ri ty'y ha'e rami ajapo uka? — he'i.

**29** Ha'e rami rã Absalão rembiguai kunumigue Amnom re ojapo okuapy Absalão ojapo ukaague. Ha'e ramo huvixa ra'y kuery ikuai va'e oexa vy opu'ãmba vy peteĩ-teĩ guymba áry oĩ vy onhamba.

**30** Ha'e kuery tape rupi teri oo reve ayvu mombe'ua ovaẽ Davi-a py aipoe'i va'e:

— Xeruvixa, Absalão tu ndera'y kuery ha'e javive ma ojukapa, neĩ peteĩve ndopytai — he'i.

**31** Ha'e rami rã huvixa opu'ã vy omondoro oao, ha'e ho'a yvy rupi. Hembiguai kuery hexeve ikuai va'e ha'e javi avi omondoro oao.

**32** Davi ryvy Siméia ra'y Jonadabe oĩ avi. Ha'e va'e ombovai vy aipoe'i:

— Xeruvixa, exa'ã eme ndera'y kuery ha'e javi ojukapaa rami, Amnom anho'i omano. Mba'eta Absalão ma gueindy Tamar re Amnom onhea'ã reia ára guive ha'e rami aguã ae onhembopy'a va'ekue.

**33** Ha'e nunga rupi aŷ xeruvixa, erovia eme ha'e rami ete, ndera'y kuery omanombaa rami e'ŷ. Mba'eta Amnom anho'i ko omano — he'i.

**34** Ha'e gui Absalão ma ojava ma ra'e.

Ha'e gui tembiguai oikuua pota ho'amy va'e ma guakykue katy tape oĩ va'e re oma'ě vy oexa yvy'ã katy gui heta oguejy jekuaa jogueruvy va'e.

**35** Ha'e ramo Jonadabe aipoe'i huvixa pe:

— Xeruvixa, pee ma ou jekuaa ndera'y kuery. Xee nerembiguai xeayvuague rami ae oiko ra'e — he'i.

**36** Ha'e va'e ijayvupa ramove'i huvixa ra'y kuery ovaẽmba okuapy. Ha'e vy onhendu ratã reve ojae'o okuapy. Ha'e rã huvixa ha'e hembiguai kuery ha'e javive avi ojae'o raxa okuapy.

### *Talmai rekoa katy Absalão ojavaague*

**37** Ha'e rã Absalão ma ojava vy oo Gesur pygua huvixa Amiúde ra'y Talmai rekoa katy. Ha'e rã Davi ma ojae'o tema gua'y re ko'ẽ nhavõ.

**38** Ha'e rami vy Absalão ojava vy oo Gesur katy. Ha'e py ma mboapy ma'etŷa peve oiko.

**39** Ha'e ramo ma Davi opytu'u Absalão oekaa gui, mba'eta ipy'a porã ju ma Amnom omanoague gui.

# 14

*Jerusalém tetā katy Absalão ojevy juague*

<sup>1</sup> Ha'e gui huvixa opy'a py oexa nga'u tema gua'y Absalão. Ha'e nunga Zeruia pi'a Joabe oikuua vy

<sup>2</sup> ogueru ruka peteī kunha hi'arandu va'e Tecoa tetā gui. Ha'e vy aipoe'i ixupe:

— Ejexa uka iporiau vaipa va'e rami, emoī ao ndeporiaua pygua, enhemoatyrō eme azeite py, ha'e enhemoingo omano va'ekue re are ma iporiau oikovy va'e rami.

<sup>3</sup> Ejexa uka ha'e rami huvixa pe, ha'e ndeayvu hexeve aipoa'eague rupi anho — he'i. Ha'e vy Joabe omombe'u ijayvu aguā.

<sup>4</sup> Ha'e gui huvixa pe Tecoa pygua kunha ojexa uka vy ojero'a reve oĩ guenapy'ã re, ngova yvy re omovaẽ reve. Ha'e vy aipoe'i:

— Xeruvixa, xepytyvõ ke!

<sup>5</sup> Huvixa oporandu:

— Mba'e ha'vy rerekó?

Ombovai:

— Aikore! Xee nerembiguai ma kunha imeve'ŷ va'e aiko xeme omano rire.

<sup>6</sup> Xee areko va'ekue mokoī xepi'a. Ha'e kuery ma jomeme joguero'a mba'ety py. Imboja'oarā nda'ipoai rã peteī ma guyke'y oipyxo vy ojuka.

<sup>7</sup> Ha'e ramo xeretarā kuery ha'e javi opu'āmba okuapy xee nerembiguai rovai, ha'e vy aipoe'i okuapy xevy: “Emboaxa na orepo py guyke'y jukaare, rojuka aguā omano va'ekue rekovia, ha'e rami vy romomba aguā ndee rire nemba'ekue jopyarā”, he'i okuapy. Ha'e rami vy 'rã ha'e kuery ombogue tapyī opa vygua areko va'ekue, ha'e

xeme rery voi, ta'ykue yvy re ndoikovevei aguã rami – he'i.

**8** Kunha va'e pe huvixa ombovai:

– Tereo ndero katy. Ha'e rã xee ajapo 'rã ndeayvuague – he'i.

**9** Tecoa pygua kunha aipoe'ive ju huvixa pe:

– Ha'e gui xeruvixa, tove xere ha'e xeru ro pygua kuery re toĩ ha'e nungakue re ropaga aguã. Ha'e rã ndee xeruvixa, tenda repenaaty py reĩ va'e re toĩ eme.

**10** Huvixa ombovai:

– Nderovai ijayvuave ri ramo eru xea py. Ha'e ramo nanemoangekovei 'rã – he'i.

**11** Kunha va'e aipoe'i:

– Ha'e rami rã xeruvixa, eura ke SENHOR Nderuete rery rupi, ojepyxe vy ou va'e kuery ojuka e'ŷ aguã xepi'a jouguy omoẽague re.

Ombovai:

– Anhetẽ ete SENHOR oikove va'e rupi aura vy aipoa'e: Neĩ peteĩ'i ma voi ndepi'a'a ndo'a rivei 'rã yvy py – he'i.

**12** Ha'e gui ma kunha va'e aipoe'i:

– Xeruvixa, tove xee nerembiguai tamombe'uve'i ju peteĩ ayvu ndevy.

Ombovai:

– Emombe'u tema – he'i.

**13** Kunha va'e ijayvuve tema:

– Mba'e re tu ndee ha'e rami e'ŷ renhem-bopy'a Nhanderuete pegua kuery rovai reiko aguã? Mba'eta xeruvixa, ha'e rami ndeayvua rami vy ndee ae renhem-bopaga uka, mba'eta ndee voi ndereru ruka jevyxei nderay amboae yvy katy remondouka va'ekue.

**14** Mba'eta nhande kuery ma nhamano 'rāe, yvy py yy onhoē mbyre nanhamboyrū kuaaveia rami. Ha'e rā Nhanderuete ma nanhandejuka rivei 'rā, ha'e rami 'rāgue py onhembopy'a 'rā henonde gui omondouka pyre mombyry riae ikuai e'ŷ aguā re.

**15** Aŷ ma xeruvixa, pova'e ayvu rupi ndereve xeayvu vy ae aju, heta va'e kuery xemongyje ramo. Ha'e ramo xee nerembiguai aipoa'e: "Xeayvu 'rā huvixa reve. Xapy'a rei rā ha'e ojapo 'rā xeayvua", ha'e vy aju.

**16** Mba'eta ndee xeruvixa, xee nerembiguai re reikuua pota 'rā avakue po gui xerepy aguā, xee ha'e xepi'a rekove ha'e kuery oipe'a e'ŷ aguā, Nhanderuete mba'emo ome'ẽ rā rojopy e'ŷ aguā rami.

**17** Xee nerembiguai teīgue ju aipoa'e ta: Aŷ xeruvixa, ndeayvu ke aiko porā ju aguā rami. Mba'eta ndee ma Nhanderuete guigua anjo rami reikuua va'e mba'emo porā ha'e mba'emo vai. Ha'e SENHOR Nderuete oiko 'rā ndereve – he'i.

**18** Ha'e ramo huvixa ombovai vy aipoe'i kunha va'e pe:

- Ajerure renhenhomí e'ŷ aguā ndevy aporandu taa re.

Kunha va'e ombovai:

- Ndeayvu ha'vy, xeruvixa – he'i.

**19** Huvixa aipoe'i:

- Joabe e'ŷ teve ndereve ijayvu va'ekue pova'e ha'e javi rupi ndeayvu aguā?

Kunha va'e ombovai:

- Anhetē ete xeruvixa, nderekove rupi aura vy aipoa'e: Ndeayvua gui mavaeve ojepe'a aguā nda'evei, oiporu kuaa regua katy neñ oiporu kuaa e'ŷa katy. Mba'eta anhetē nerembiguai Joabe ae

ri xembou ra'e pova'e ayvu ha'e javi rupi xeayvu aguã.

<sup>20</sup> Ha'ekue rami ve'ŷ reiko aguã ae ri nerembiguai Joabe ojapo uka ha'e rami. Ha'e rami teĩ xeruvixa, Nhanderuete guigua anjo rami ne'arandu va'e vy yvy jave re oiko va'e teĩ reikuaapa 'rã – he'i.

<sup>21</sup> Ha'e gui ma Joabe pe ju huvixa aipoe'i:

– Aendu ma rejerure ucaa. Tereo ha'vy, eru kunumi Absalão – he'i.

<sup>22</sup> Ha'e ramo Joabe ojero'a vy guenapy'ã re oĩ ngova yvy re omovaẽ peve. Ha'e vy huvixa ogueroayvu porã vy aipoe'i:

– Aŷ ma xeruvixa, aikuua ma ndee xejou porãa, xee nerembiguai ajerure ukaague rejapo rire – he'i.

<sup>23</sup> Ha'e rami vy Joabe opu'ã vy oo Gesur katy. Ha'e vy Jerusalém py ju ogueru Absalão.

<sup>24</sup> Ha'e rami rã huvixa aipoe'i:

– Tojevy ju ngoo py xerova oexa e'ŷ re – he'i ramo Absalão ngoo py ae ojevy huvixa rova oexa e'ŷ re.

### *Absalão iporãa re ijayvuague*

<sup>25</sup> Israel ha'e javi rupi amboae nda'ipoi Absalão rami ojou porãmby. Ipy guive ijapyte peve noĩ ivaikuea.

<sup>26</sup> Hi'a ma ma'etŷa opaa nhavõ ojaya vy ipoyia oexaa rã dois quilos raxa'i 'rã, mba'emo opejaa huvixa oiporu uka va'e rami.

<sup>27</sup> Oiko avi ta'y mboapy ha'e peteĩ'i tajy, Tamar hery va'e. Ha'e va'e kunha ma jaexa rã iporã ete va'e.

### *Davi oĩa py Absalão ooague*

**28** Mokoï ma'etŷ re ma huvixa rova oexa e'ŷ re Jerusalém py Absalão oiko vy

**29** oenoï uka Joabe, huvixaa py omondouka aguã teĩ ha'e ndouxei. Peteïgue ju oenoï uka teĩ ha'e ndouxei.

**30** Ha'e ramo aipoe'i guembiguai kuery pe:

— Ma'ẽ, pee py ma Joabe mba'ety itui xemba'ety re oje'a va'e, cevada onhotŷague. Tapeo peapy — he'i ramo Absalão rembiguai kuery oapy imba'ety.

**31** Ha'e rami rã Joabe opu'ã vy oo Absalão ro py. Ha'e vy aipoe'i:

— Mba'e re tu nerembiguai kuery oapy ri xemba'ety?

**32** Absalão ombovai:

— Roenoï uka vy aipoa'e va'ekue: “Eju apy, huvixaa py romondouka aguã, po rami xeayvu remombe'u aguã: ‘Mba'erã tu aju raka'e Gesur tetã aikoague gui? Ha'eveve 'râgue ha'e py ae aiko va'e rire', 're aguã.’” Aŷ ma xee aexaxe huvixa rova. Xapy'a rei xee ri ajejavý ramo ma taxejuka — he'i Joabe pe.

**33** Ha'e ramo huvixaa py Joabe oo vy omombe'upa. Ha'e ramo mae huvixa oenoï uka Absalão. Ha'e ramo ou vy ojexa uka huvixa renonde, ngova yvy re omovaë reve. Ha'e ramo huvixa oayvupa.

## 15

*Absalão opu'ã rei ramo Davi kuery onham-baague*

<sup>1</sup> Ha'e va'e rire ma Absalão ojeupe ae ojou peteĩ karóxa, kavaju kuery ha'e cinqüenta avakue henonde oo va'erã.\*

<sup>2</sup> Ha'e rami vy aje'ive'i reve Absalão ovy vy opyta 'rã ho'amy tetã kora rokẽ py. Ha'e ramo avakue huvixaa katy mba'emo re oikuua pota uka vy oo va'e ha'e javi pe Absalão aipoe'i 'rã: "Mava'e tetã guigua tu ndee?" he'i rã ombovai vy "Israel regua ae ri xee nerembiguai aiko" he'i

<sup>3</sup> ramo ma Absalão aipoe'ive ju 'rã ixupe: "Ma'ẽ, reikuua pota ucaa va'e ma ha'evea ramigua, ha'evea rami meme. Ha'e rami teĩ huvixa ma avave rei nomoĩ oendu va'erã", he'i 'rã.

<sup>4</sup> Absalão aipoe'ive ju 'rã: "Aikore! Yvy re opena va'etyrã xemoĩa va'e rire, avakue mba'emo re oikuua pota uka vy, e'ŷ vy ojerure aguã xea py ou ramo ha'e kuery re ajapo 'râgue ha'evea ramigua meme!" he'i 'rã.

<sup>5</sup> Ha'e rami ae avi henonde amongue ou vy henonde yvy py ojero'a ta ramo ha'e okuave'ẽ vy omopu'ã ju 'rã oayvupa reve.

<sup>6</sup> Ha'e rami py Absalão ojapo Israel kuery huvixaa katy mba'emo re oikuua pota uka vy oo va'e ha'e javi re. Ha'e rami vy ojee meme oguerovapa avakue Israel kuery kuraxõ.

<sup>7</sup> Irundy ma'etŷ opaa py ma Absalão aipoe'i huvixa pe:

— Tove Hebrom tetã katy taa SENHOR pe anhemboayvuague ajapo aguã.

<sup>8</sup> Mba'eta Síria re Gesur tekoa py teri aiko jave xee nerembiguai anhemboayvu vy aipoa'e va'ekue:

---

\* **15:1** Israel pygua huvixa kuery gui Absalão ranhe guendarã karóxa ojou raka'e. Opa mba'e ojapo huvixarã onhemoingo aguã.

“Xapy'a rei Jerusalém katy ajevy aguã rami SEN-HOR xeapo ri ramo ambojerovia 'rã”, ha'e rire.

<sup>9</sup> Huvixa ombovai:

— Tereo porã ke — he'i. Ha'e ramo opu'ã vy Hebrom katy oo.

<sup>10</sup> Ha'e rami avi Absalão nhemi rupi omondouka ayvu mombe'uarã Israel kuery va'e regua ha'e javi rupi. Ha'e vy aipoe'i:

— Mimby guaxu pu pendu vy aipopeje 'rã: “Absalão ma Hebrom tetã py oĩ nhanderuvixa”, peje.

<sup>11</sup> Jerusalém gui Absalão rupive oje'oi duzentos avakue oenoĩ va'ekue. Ha'e va'e kuery ma oo tema rive, mba'erã paa oikuua vy e'ŷ.

<sup>12</sup> Absalão mba'emo Nhanderuete pe ome'ẽ oikovy jave oenoĩ uka avi Davi mongetaaty Aitofel Gilo tetã py hekoa va'e. Ha'e rami py huvixa rovaigua kuery imbaraeteve oje'oivy, heta-etave tema ou Absalão-a katy guarã.

<sup>13</sup> Ha'e gui peteĩ ou ayvu mombe'ua Davi pe. Ha'e vy aipoe'i:

— Israel kuery ha'e javive ko Absalão re anho ovapa — he'i.

<sup>14</sup> Ha'e rami rã Davi aipoe'i Jerusalém py hexeveguia avakue ikuai va'e pe:

— Pepu'ã ke, nhanha, mba'eta Absalão gui ndajaa jepe reguai teve. Pejapura ke jaje'oi pojava, nhanderupity xapy'a e'ŷ aguã, ha'e nhande'áry mba'emo vai ogueru reve tetã py ikuai va'e ha'e javi ojukapa e'ŷ aguã kyxe py.

<sup>15</sup> Ha'e ramo huvixa Davi revegua avakue ombovai:

— Ma'ẽ, apy ma nerembiguai orekuai, oreruvixa ojapo uka va'e tema rojapo aguã ae — he'i okuapy.

**16** Ha'e gui huvixa ojepe'a ramo hoo pygua kuery ha'e javi oje'oi hexeve. Va'eri oeja avi dez gua'yxy jevy kuery ngoo re opena va'erā.

**17** Ha'e rami vy heta va'e kuery hupive oje'oi va'e reve huvixa oo rā oo ijapy'i py oī va'e py opytapa ranhe.

**18** Ha'e gui hexeveguia avakue ha'e javi oaxa henonde katy. Ha'e vy harõa ha'e Gate pygua kuery ha'e javi ju, seiscentos avakue Gate pygua hupive oje'oi va'ekue oaxa jogueravy huvixa renonde.

### *Itai ojeroviapy oikoa oexa ukaague*

**19** Ha'e gui ma huvixa aipoe'i Gate pygua Itai va'e pe:

— Mba'e re tu ndee reoxe avi ore kuery reve? Ejevy ju, epyta penderuvixarā ou va'e reve, mba'eta amboae yvy guigua reiko, ndeyvy gui ae mombyry reiko va'e.

**20** Kuee rei revaē va'ekue ma nhi'ā xee rogueraa ta ma avi xerupive aŷ, neĩ xee ma voi ndaikuai marā katy pa aa aguā va'eri? Ejevy ju, erojevypa avi nderyvy kuery. Tove ndere toĩ Nhanderuete nemboaxya ha'e ojeroviapy oikoa.

**21** Ha'e ramo Itai ombovai huvixa pe:

— Anhetē ete SENHOR oikove va'e rupi, ha'e ndee xeruvixa nderekove rupi avi aura vy aipoa'e: Mamo rā rei ndee xeruvixa reĩa py ae xee nerembiguai aiko avi 'rā, amano e'ŷ vy aikove aguā teĩ — he'i.

**22** Ha'e ramo Davi aipoe'i Itai pe:

— Tereo ha'vy, eaxa xerenonde katy — he'i. Ha'e ramo Gate pygua Itai ma hexeveguia avakue ha'e javi reve oo, kyrīgue guive.

<sup>23</sup> Ha'e kuery oo rā ha'e va'e yvy re ikuai va'e oexa vy ojae'o ratā pavē.<sup>†</sup> Ha'e rā ha'e kuery oaxa oje'ivy. Cedrom yakā huvixa voi oaxa, tekoa e'ÿa katy tape oĩ va'e rupi oo vy.

*Jerusalém tetā katy ju Zadoque, Abiatar ha'e Husai ombojevyague*

<sup>24</sup> Oaxa avi sacerdote Abiatar ha'e Zadoque. Ha'e kuery reve oje'oi avi levita kuery SENHOR guexeve guarā ojapo va'ekue ryru reraa kuery. Ha'e py omboguejy ranhe, tetā gui ha'e kuery ha'e javi oẽ vy oaxapa peve.

<sup>25</sup> Ha'e ramo huvixa Davi aipoe'i Zadoque pe:

— Perojevy ju SENHOR ayvu ryru tetā katy. SENHOR rembiexa rupi xemboaxy ri vy xeapo 'rā ha'e katy ju ajevy aguā rami hyru aexa ju aguā, oīaty voi.

<sup>26</sup> Ha'e rami teĩ xapy'a rei SENHOR xevy “Xee ndoguerovy'avei”, he'i ramo, ma'ẽ, xee ma apy ha'ã. Tojapo xere ha'e oipotaa rami – he'i.

<sup>27</sup> Sacerdote Zadoque pe huvixa aipoe'ive ju:

— Ndee ha'e Abiatar imba'ekuaa va'e vy pejevy porā'i ke tetā katy. Pendereve too porā'i avi pendera'y mokoõ: ndera'y Aimaás, Abiatar ra'y Jônatas guive.

<sup>28</sup> Ma'ẽ, peẽ pemombe'u uka jevy e'ÿa ja xee apyta ranhe 'rā yy oaxaaty tekoa e'ÿa katy oĩ va'e py – he'i.

<sup>29</sup> Ha'e ramo Zadoque ha'e Abiatar ma Jerusalém katy ju ogueraa Nhanderuete ayvu ryru. Ha'e py ae oypyta.

---

† **15:23** Ha'e kuery ojae'o mba'eta huvixa guetā gui onha ramo (versículo 20).

**30** Ha'e gui Davi oguatave ovvy vy Oliveiras yvy'ã rupi oẽ ovvy ojae'o reve. Oakã ojao'i ha'e ipy rei reve oguata ovvy. Hupive oje'oi va'e ha'e javi oakã ojao'i reve meme ojae'o avi jogueravy.

**31** Ha'e rire Davi pe omombe'ua vy aipo'ea:

— Aitofel voi Absalão reve opyta ndere opu'ã rei va'e kuery mbyte.

Ha'e ramo Davi aipoe'i:

— SENHOR, xee ajerure: ejapo Aitofel o'arandua rupi e'ŷ nhomongeta aguã rami — he'i.<sup>‡</sup>

**32** Ha'e gui yvyty apyte áry Davi ovaẽ SENHOR ombojeroviaaty py. Ha'e jave ha'e oma'ẽ rã peteĩ ovaẽ ouvy arquita regua Husai. Ha'e va'e ma oao puku oxoropa va'e py onhemonde reve ou, ha'e oakã re yvy omoĩ reve.

**33** Ixupe Davi aipoe'i:

— Xerupive reo aguã ri reju ramo nda'evei xevy.

**34** Ha'eveve 'rã tetã katy rejevy vy Absalão pe aipo're: “Aŷ ma xeruvixa, xee ma nerembiguai ju 'rã aiko, nderu rembiguai aikoague rami avi. Ha'ekue rami ae 'rã aiko nerembiguai”, 're vy rejapo 'rã Aitofel ijayvu rã Absalão oendu ve'ŷ aguã rami.

**35** Ha'e py ndereve ikuai avi 'rã sacerdote kuery Zadoque ha'e Abiatar. Huvixa ro py mba'emo rendu va'ekue ha'e javi 'rã remombe'u uka ha'e kuery pe.

**36** Ta'y kuery avi 'rã ikuai ha'e py: Zadoque ra'y Aimaás ha'e Abiatar ra'y Jônatas. Ha'e kuery pe ma

---

<sup>‡</sup> **15:31** Aitofel ma huvixa mongetaaty oiko. Davi mongetaa rupi ranhe oiko, ha'e gui Absalão mongetaa rupi ju (versículo 12).

xeremiendurã pemombe'u uka 'rã mba'emo pyau  
pendu va'ekue ha'e javi – he'i.

<sup>37</sup> Ha'e ramo Davi irũ Husai ojevy ju tetã katy.  
Absalão voi ovaẽ ma avi Jerusalém py.

## 16

### *Davi reve Ziba ijayvuague*

<sup>1</sup> Ha'e gui Davi ma yvy'ã guy katy ojapyro ový  
jave ou jekuaa oiny Mefibosete rembiguai Ziba.\*  
Ha'e va'e ma mokoĩ mymba mburika'i ogueru  
ombokupe áryguapa va'ekue, ha'e hi'áry duzentos  
mbojape, ha'e cem xã uva pirukue, cem avi hi'a  
pyau, ha'e gui peteĩ ryru vinho.

<sup>2</sup> Ziba ou rã Davi oexa vy oporandu ixupe:

— Mba'erã tu kova'e nunga reru?

Ziba ombovai:

— Mymba mburika'i ma hi'áry huvixa ro pygua  
kuery oĩ aguã. Ha'e rã mbojape ha'e mba'emo'a  
ma kunumigue ho'u va'erã aru. Vinho ma tekoa  
e'ýa rupi penekane'õ vy pey'u va'erã – he'i.

<sup>3</sup> Ha'e rã Davi oporanduve ju:

— Ha'vy nderuvixa ra'y, mamo tu opyta?

Ziba ombovai:

— Ha'e ma Jerusalém py ae opyta, mba'eta oje-  
upe ae “Kova'e ára po xevy ju 'rã Israel ro pygua  
kuery omboaxa xeru rekovia xepo'aka aguã”, he'i  
vy.

<sup>4</sup> Ha'e rami rã Davi aipoe'i Ziba pe:

\* **16:1** Ziba ma Saul rembiguai ranhe oiko, ha'e gui Jônatas ra'ykue  
Mefibosete rembiguai ju (2 Samuel 9.9-10).

— Mefibosete oguereko va'ekue-'ekue ma ame'ëmba ndevy.<sup>†</sup>

Ziba ombovai:

— Xeruvixa, xee ajero'a romboete vy. Taxem-boaxy nerentonde — he'i Davi pe.

### *Davi re Simei ijayvu vaiague*

<sup>5</sup> Ha'e gui Baurim tekao py huvixa Davi ovaë vy oma'ë rã peteï ovaexi jogueruvy Saul ro pygua kuery regua Simei hery va'e, Gera ra'y. Ha'e va'e ovaexi vy ijayvu vai ouvy hexe.

<sup>6</sup> Davi re ita omombo ouvy, hembiguai kuery re guive, Davi reveguia ha'e hembiguai xondaro kuery ooa yke jovaive rupi oje'oi oiny va'eri.

<sup>7</sup> Simei ijayvu vai vy aipoe'i:

— Tereo apy gui, tereo ke, ndee ava tuguy moëaty, nhe'ë vai ra'y.

<sup>8</sup> Aÿ Nhanderuete nembopaga ma Saul ro pygua kuery ruguy omoëague re, hekovia ndee nhemi rupi reï rire. Ha'e rami teï ndera'y Absalão po py ju SENHOR omboaxa. Ma'ë, aÿ ma reximbä reia rupi reiko, ava tuguy moëaty reiko vy — he'i.

<sup>9</sup> Ha'e rami rã Zeruia pi'a Abisai aipoe'i Davi pe:  
— Xeruvixa, mba'e re tu peva'e jagua re'õgue ijayvu vai ri ndere? Tove taaxa apy gui akä'o aguã.

<sup>10</sup> Huvixa ombovai:

— Mba'e tu xee areko peë Zeruia pi'a kuery reve?  
Tove ri ta'ijayvu vai. Mba'eta xapy'a rei SENHOR ae ixupe ijayvu vy “Ndeayvu vai Davi pe”, he'i raka'e.

---

<sup>†</sup> **16:4** Ziba pe Davi omboaxa mba'emo Mefibosete oguereko va'ekue, mba'eta ixupe Ziba ijapu vy Absalão re Mefibosete ooague rami omombe'u ramo. Ha'e rã Mefibosete ma ndooi (2 Samuel 19.24-30).

Ha'e rami ri ramo maya'e tu “Mba'e re tu ha'e rami ete rejapo?” he'i aguā ha'eve ta? — he'i.

**11** Davi aipoe'ive ju Abisai ha'e guembiguai kuery ha'e javive pe:

— Ne'exa, xera'y ae teĩ xejukaxe aŷ, ha'e rami peva'e Benjamim regua katuve ma. Tove ta'ijayvu vai, mba'eta SENHOR ae ojapo uka ha'e rami.

**12** Xapy'a rei SENHOR oma'ẽ 'rã xee ajexavaia re. Ha'e rami ri vy mba'emo porã anho 'rã SENHOR ome'ẽ xevy kova'e ára ayvu vaiague rekovia — he'i.

**13** Ha'e gui ma oguatave oje'oivy, Davi ha'e ixupegua avakue reve. Ijyke rupi Simei voi oo avi oiny yvy'ã pukukuea rupi. Ijayvu vai tema ovv, ita ha'e yvy guive omombo ovv hexe.

**14** Ha'e gui huvixa ha'e hupive oguata va'e kuery reve ma ikangypakue ovaẽ oje'oivy Jordão yakã rembe re. Ha'e py ma ikane'õgu ranhe okuapy.

*Absalão pegua oikoa rami Husai ombotavya rupi onhemombe'uague*

**15** Ha'e gui Jerusalém tetã py Absalão kuery ovaẽmba okuapy ixupegua avakue Israel regua ha'e javi reve. Ha'e kuery reve ou avi Aitofel.

**16** Ha'e gui Davi irũ Husai arquita va'e voi ojexa uka avi Absalão pe. Ha'e vy aipoe'i ixupe:

— Toikove huvixa, toikove huvixa!

**17** Ha'e rã Absalão aipoe'i Husai pe:

— Ha'e rami ae teve rexu uka neirũ Davi pe reikoa? Mba'e re tu ndereoi neirũ rupive?

**18** Husai ombovai:

— Any ri. Xee apyta 'rã hekovia SENHOR omoĩ va'ekue reve. Kova'e kuery Israel pygua avakue

ha'e javi oiporavo va'ekue reve xee voi aiko 'rã, hexeve ae 'rã.

<sup>19</sup> Mba'eta mava'e pe 'rã tu aiko aguã ha'eve? Ndee ta'y pe e'ÿ ri ty'y? Nderu rembiguai aikoague rami ae ndevy ju 'rã aiko xee – he'i.

*Davi ra'yxy jevy kuery reve Absalão onhenoague*

<sup>20</sup> Ha'e gui ma Absalão aipoe'i Aitofel pe:

– Oremongeta na mba'e nunga pa rojapo aguã.

<sup>21</sup> Aitofel ombovai Absalão pe:

– Nderu ra'yxy jevy kuery oeja ov y ngoo re opena va'erã. Enheno ha'vy ha'e kuery reve. Ha'e ramo nderu reve joe napendea'eveia Israel kuery ha'e javi oikuaa ramo nderevegua kuery ipy'a guaxuve 'rã okuapy – he'i.

<sup>22</sup> Ha'e gui ma oo áry ojapo okuapy peteñ oo'i Absalão oĩ aguã. Ha'e ramo ha'e py, Israel kuery pavẽ oexaa py onheno nguu ra'yxy jevy kuery reve.

<sup>23</sup> Ha'e va'e jave Aitofel nhomongeta 'rã Nhan-deruete pe oporandua rã ombovai rami avi. Ha'e rami ae tema Aitofel ijayvu nhomongeta vy, Davi omongetaague rami ae avi omongeta Absalão.

## 17

*Aitofel ha'e gui Husai ju omongetaague*

<sup>1</sup> Aitofel aipoe'ive ju Absalão pe:

– Tove taiporavo doze mil avakue. Ha'e vy Davi rakykue aa 'rã kova'e pyavyve.

<sup>2</sup> Hexe apu'ã 'rã ikane'õ ha'e ikangypa rei jave. Amondyipa 'rã. Ha'e rã hexeve ikuai va'ekue onhamba 'rã. Huvixa anho'i 'rã ajuka.

<sup>3</sup> Ha'e kuery ajapo 'rā ndere oupa ju aguā rami meme. Mba'eta ha'e kuery ha'e javi ojevypa 'rā, peteī'i ava rejukaxeа rami rejuka uka rire. Ha'e rami vy ikuai porāmba 'rā – he'i.

<sup>4</sup> Ha'e rami ijayvu rā Absalāo ha'e Israel regua nhomongeta va'ety kuery ha'e javi oendu vy ojou porā rei okuapy.

<sup>5</sup> Ha'e rami teī Absalāo aipoe'ive ju:

— Penoī ta'vy arquita regua Husai ju, nhaendu aguā ha'e pa mba'e he'i ra'e – he'i.

<sup>6</sup> Absalāo-a py Husai ovaē ramo aipoe'i ixupe:

— Ha'e rami Aitofel ijayvu ange. Ha'eve 'rā pa ijayvua rami jajapo aguā? Ha'e rami e'ŷ vy ndee ju ke ndeayvu.

<sup>7</sup> Husai ombovai Absalāo pe:

— Aitofel ange ijayvuague ma ha'eve va'e'ŷ – he'i.

<sup>8</sup> Husai aipoe'ive ju:

— Reikuaa porā nderu ha'e avakue hexeve ikuai va'e reko, reikuaa avi ha'e kuery ipy'a guaxukueve ikuia, ha'e urso kunha ka'aguy rupi gua'y kuery omokanhy va'e rami ipoxy va'e memea. Nderu voi joe opu'ā va'ety vy pyávy teī ndopytai 'rā ojeupegua kuery reve.

<sup>9</sup> Ne'exa, aŷ ma ha'e oma'ē mbegue 'rā peteī itakua gui, e'ŷ vy amboae henda py. Ha'e gui jypy'i hexe pepu'āa py ndevyguia kuery amongue oitya ri ramo ha'e nunga oendu va'e rei ijayvu vy "Absalāo rupi ou va'ekue oitypaa ra'e" he'i 'rā.

<sup>10</sup> Ha'e rami rā ma avakue ipy'a guaxukueve voi okyjepa rei 'rā, xivi rami ipy'a guaxu va'e teī. Mba'eta Israel kuery pavē oikuaa nderu ma joe

opu'ãa py ipo'akave va'ety ae, ha'e hexevegua avakue voi ipy'a guaxukueve memea.

**11** Xee ma po rami romongeta: Emboatypa pojava ndejeupe Israel kuery ha'e javi, Dã guive Berseba peve ikuai va'e, ye'ẽ rembe re ita ku'i ikuai rami mbovy rei e'ŷ ikuai va'e. Ha'e vy ndee ae 'rã reraa henoiny ha'e kuery mbyte rupi.

**12** Ha'e vy ma Davi re jaje'oi 'rã mamo rã rei oĩa py, ha'e vy jajopy xapy'a 'rã, yxapy minha yvy re ho'aa rami. Ha'e ramo ndoikovevei 'rã, hexevegua avakue voi ndokuavei 'rã teĩve.

**13** Xapy'a rei amongue tetã py ha'e onhemi ramo ma ha'e katy Israel kuery ha'e javi 'rã ogueraa ixã. Ha'e vy jaitypa 'rã heravy yakã katy, oĩague py neĩ peteĩ'i ita ra'y'i voi nda'ipovei peve – he'i.

**14** Ha'e rami rã Absalão ha'e Israel pygua avakue aipoe'i okuapy:

– Aitofel ijayvuague gui ma arquita regua Husai ijayvua ha'eveve – he'i okuapy, mba'eta SENHOR ae ojapo Aitofel ijayvua oendu rivepa aguã rami, Absalão kuery áry mba'emo vai ombouxe vy.

**15** Ha'e gui ma Husai aipoe'i sacerdote kuery Zadoque ha'e Abiatar pe:

– Aitofel ma ha'e rami omongoeta kuri Absalão ha'e Israel regua nhomongoeta va'ety kuery. Ha'e rã xee ma amboae rami amongoeta.

**16** Aŷ pemondouka pojava ha'vy Davi pe ayvu mombe'uarã aipoe'i aguã: “Epyta eme kova'e pytû yy oaxaaty tekoa e'ŷa katy oĩ va'e py. Ha'e rami 'rãgue py eaxa pojava hovaigua re, huvixa ojukaa e'ŷ aguã, hexeve ikuai va'e kuery reve”, peje uka – he'i.

<sup>17</sup> Ha'e jave ma Jônatas ha'e Aimaás ma En-Rogel katy'i oĩ, tetã py ha'e kuery ovaẽ rã oexaa e'ŷ aguã. Ha'e gui ha'e kuery pe peteĩ tembiguai kunha'i omombe'u ha'e nunga, Davi pe ju ha'e kuery omombe'u aguã.

<sup>18</sup> Ha'e rami teĩ peteĩ kunumi va'e oexa nho vy ou Absalão pe omombe'u. Ha'e rã mokoïve ma ojapura reve jogueraa vyvoi vy peteĩ ava ro py ovaẽ, Baurim tekoa py. Ha'e va'e roka py oĩ peteĩ ykua ojo'o pyre. Ha'e va'e py ha'e kuery oguejy jogueravy.

<sup>19</sup> Ykua mbotya hoo va'e ra'yxy ogueru vy omoĩ hi'áry. Imbotya áry ju mba'emo ra'yigue onhoẽ. Ha'e rami rã mava'eve ndoikuaai.

<sup>20</sup> Ha'e va'e oo py Absalão rembiguai kuery ovaẽ vy aipoe'i okuapy kunha va'e pe:

— Mamo tu ikuai Aimaás ha'e Jônatas?

Kunha va'e ombovai:

— Ha'e kuery oaxapa ae ma yy oaxaaty — he'i. Ha'e ramo ha'e kuery oeka teĩ ndojoui vy ojevypa ju Jerusalém katy.

<sup>21</sup> Ha'e kuery oje'oi ramove ykua gui oẽ mokoïve. Ha'e rami vy oo vy omombe'u Davi pe. Ha'e vy aipoe'i:

— Pepu'ã ke, peaxapa pojava yy rovai re, mba'eta ha'e rami Aitofel ijayvu penderovai — he'i.

<sup>22</sup> Ha'e rami rã Davi ha'e hexeveguia kuery ha'e javi oaxapa Jordão yakã. Ko'ẽmba ma jave takykue re neĩ teĩ'i voi nda'ipoi Jordão oaxa e'ŷ va'e.

<sup>23</sup> Ha'e gui Aitofel ma nhomonetaague rami e'ŷ ikuiaia rã oexa vy ombokupe árygua guymba mburika'i, ha'e oĩ vy oo tetã py ngoo oĩ va'e py.

Mba'emo omoīmba porā ma vy ha'e ae oo oje-jyryvipy. Omano ramo onhono porāa tuu rupa yvýry.

<sup>24</sup> Ha'e gui Davi kuery ma Maanaim py ovaē. Absalão kuery voi Jordāo yakā oaxapa, avakue Israel kuery hexeve ikuai va'e reve.

<sup>25</sup> Ha'e vy xondaro kuery ruvixa Joabe rekovia ma Absalão omoī Amasa. Ha'e va'e ma Ismael guigua Itra ra'y, Naás rajy Abigail pi'a. Abigail ma Joabe xy Zeruia kypy'y.

<sup>26</sup> Ha'e rami vy Israel kuery Absalão reve ijatypa okuapy Gileade vvy re.

*Absalão reveguia xondaro kuery re Davi reveguia kuery ipo'aka okuapyague*

<sup>27</sup> Maanaim py Davi kuery ovaē ma ramo ovaexī jogueruvy pova'e kuery: Amom kuery va'e regua Rabá pygua Naás ra'y Sobi, ha'e gui Lo-Debar pygua Amiel ra'y Maquir, ha'e gui Rogelim pygua gileadita regua Barzilai avi.

<sup>28</sup> Ha'e va'e kuery ma Davi oña py ogueru tupu, hy'a, hyru nhae'ū guigua, trigo, cevada, mba'emo ku'ikue, ha'yīgue maimbe, ei retā, kumanda pe'i,

<sup>29</sup> ei, kamby kekue, vexa'i kuery ha'e gui queijo vaka guigua. Ha'e nunga oguerupa Davi ha'e hexeve ikuai va'e pe ho'u va'erā, mba'eta aipoe'i okuapy: "Kova'e kuery ma tekoa e'ŷa rupi ikuαι py inhembayyi, ikane'ō ha'e ije'yuvei guive" he'i vy.

## 18

<sup>1</sup> Davi guexeveguia kuery oipapa vy ha'e kuery ruvixarā omoī mil e'ŷ vy cem re opena va'erā.

**2** Ha'e gui mboapy henda py omboja'o vy omon-doukapa ju: peteĩ aty ma Joabe ogueraa, amboae aty ma Zeruia pi'a Abisai ogueraa, ha'e rã amboae aty ma Gate pygua Itai ogueraa. Huvixa aipoe'i ha'e kuery pe:

— Xee voi aa 'rã peẽ kuery reve.

**3** Ha'e rã ha'e kuery ombovai:

— Ndee ma ndereoi 'rã. Xapy'a rei nhan-derovaigua kuery oremonha vy orere ha'e kuery nopenai 'rã, neĩ mbyte rupi peve ore romano teĩ ae ma, mba'eta ore kuery va'e regua dez mil ikuai va'e gui ndee anho'i teĩ revareve va'e. Ha'eveve ndee orerepy aguã rami reiko aguã, tetã py reĩa gui ae — he'i okuapy.

**4** Davi ju aipoe'i ha'e kuery pe:

— Peẽ kuery peipotaa rami ha'vy xee aiko 'rã — he'i. Ha'e rami rã tetã kora rokẽ yvýry huvixa hi'aĩ jave ixupequa kuery ha'e javi oẽ jogueravy cem ha'e mil ma voi-voi.

**5** Ha'e gui ma Joabe, Abisai ha'e Itai pe ju Davi ijayvu. Ha'e vy aipoe'i:

— Xere pema'ẽ vy perekko porã'i xera'y Absalão — he'i. Amboae kuery ha'e javi oendu okuapy xondaro ruvixa kuery pe huvixa gua'y Absalão re opena porã uka rã.

**6** Ha'e gui ma ha'e javi oje'oi tetã rovai rupi, Israel kuery reve joguero'a aguã. Efraim regua ka'aguy rupi joe opu'ã okuapy.

**7** Ha'e py ma Davi rembiguai kuery oitypa Israel kuery. Ha'e va'e ára ho'a reta, vinte mil avakue ojukaa py.

**8** Mba'eta joe opu'ã va'e kuery oaĩmba oje'oivy ha'e va'e yvy ha'e javi rupi. Ha'e va'e ára kyxe py ojukaa gui okanhÿ retave ka'aguy re ikuiaia py rive.

### *Absalão omanoague*

**9** Absalão ma mburika áry oo oiny vy nhovaexí Davi rembiguai avakue reve. Hymba mburika ma peteĩ yvyra carvalho hi'aĩ va'e rakã guy rupi oaxa ovv jave Absalão akã ipija oiny yvyra rakãmby py, ha'e vy ovava oiny yvate katy gui yvy katy. Hymba mburika ma oaxa tema ovv.

**10** Peteĩ ava ha'e nunga oexa vy oo omombe'u Joabe pe. Ha'e vy

- Absalão ma yvyra carvalho rakã re ovava oiny
- he'i.

**11** Ha'e rã Joabe aipoe'i ava imombe'uare pe:

- Rexa va'eri mba'e re tu nderejukai ha'e pyve, ha'e reity 'rãgue inony yvy rupi? Ha'e rami reiko va'e rire ma ndevy ame'ẽ 'rãgue dez hatã'i va'e prata guigua ha'e peteĩ ku'akuaa — he'i.

**12** Ha'e ramo ava va'e aipoe'i Joabe pe:

- Xepo py mil hatã'i va'e prata guigua reme'ẽ teĩ xee ma nakuave'ẽi 'rã huvixa rã'y rovai, mba'eta roendu porã ange huvixa ndevy, Abisai ha'e Itai pe ijayvu ramo, "Perekó porã'i xera'y Absalão", he'i rã.

**13** Xapy'a rei xee ma nanhe'ẽ renduia rupi hexe ajapo vai va'e rire huvixa ndoikuua e'ŷi 'rãgue. Ha'e rami avi ndee eteve voi xejou vai 'rãgue — he'i.

**14** Joabe ombovai:

- Nda'evei ndereve ha'ã rive aguã — he'i vyve mboapy hu'y ogueraa vy oipyxo Absalão kuraxõ py, oikove teri reve yvyra carvalho rakãmby re ipija oinya py.

**15** Ha'e gui dez kunumigue Joabe rembiporu reraa va'e kuery ju ombojere okuapy vy ojuka ete'i Absalão.

**16** Ha'e gui ma Joabe mimby guaxu omonhe'ẽ rã ixondaro kuery opytu'upa Israel kuery monhaa gui. Ha'e vy ojevypa, Joabe omombytu'u ramo.

**17** Absalão retekue ogueraa vy omombo ka'aguy re yvykua tuvixa va'e oĩ va'e py, ha'e vy hi'áry omboaty reta ita. Ha'e rã Israel kuery ma peteĩ-teĩ ngoo katy onhamba oje'oivy.

**18** Absalão oikove teri reve omopu'ã va'ekue peteĩ ita ojeupe ae, huvixa rekaoa yvyugua py. Mba'eta aipoe'i: "Xee ndarekoi xera'y peteĩ'i ma voi xerery re ima'endu'aa aguã", he'i. Ha'e rami vy ita re ae omoĩ guery. Ha'e rami rire ha'e va'e pe aŷ peve "Absalão pegua ita" 'ea.

### *Absalão omano rã Davi ojae'o vaipaague*

**19** Ha'e gui Zadoque ra'y Aimaás aipoe'i:

— Tove taa tamombe'u huvixa pe hovaigua kuery po'akaa gui SENHOR ogueraa jepe maague.

**20** Ha'e rami teĩ Joabe ombovai:

— Ndee ma neremombe'ui 'rã teve ange mba'emo oiko va'ekue, amboae ára py ha'eve 'rã teĩ, huvixa ra'y ae omano rire — he'i.

**21** Ha'e gui peteĩ Etiópia pygua hi'aĩ va'e pe ju Joabe aipoe'i:

— Ndee katu tereo emombe'u mba'emo rexa va'ekue — he'i ramo Joabe renonde ojero'a ma vy onha ovy.

**22** Ha'e gui Zadoque ra'y Aimaás aipoe'ive ju Joabe pe:

— Ha'e rami teĩ ma tove xee voi taa Etiópia pygua rakykue.

Joabe aipoe'i:

— Mba'erã tu ndee voi renha ta, xera'y? Mba'eta ha'e nunga remombe'ua gui nderejoui 'rã hekovia — he'i.

<sup>23</sup> — Ha'e rami teĩ ae ma xee aanha ta avi — he'i ju Aimaás.

Ixupe Joabe

— Enha ha'vy eovy — he'i ramove Aimaás onha avi ovy tape yvy'ämbe rupi, ha'e vy onhokuã ovy Etiópia pygua.

<sup>24</sup> Tetã jaikea py Davi oguapy oiny mokoĩ okẽ oĩ va'e mbyte py. Peteĩ jopya ojeupi ovy okẽ yke rupi kora oĩ va'e áry. Ha'e vy oma'ẽ vy oexa peteĩ ava ha'e ae'i onha ouvy va'e.

<sup>25</sup> Ha'e vy jopya ojapukai vy omombe'u huvixa pe. Ha'e rã huvixa ombovai:

— Ha'e ae'i ri ou va'e ma mba'emo porã mombe'uarã 'rã ou — he'i. Ha'e vy ou oiny va'e ovaẽ ouvy.

<sup>26</sup> Ha'e gui jopya oma'ẽ jevy vy oexa amboae ava onha ouvy va'e. Ha'e vy teĩgue ju ojapukai okẽ py oĩ va'e pe. Ha'e vy aipoe'i:

— Amboae ava ju ha'e ae'i onha jekuaa ouvy.

Huvixa ombovai:

— Ha'e rami rã ha'e va'e voi mba'emo porã mombe'uarã 'rã ou — he'i.

<sup>27</sup> Aipoe'ive ju jopya:

— Tenonde onha ouvy va'e ma ko Zadoque ra'y Aimaás.

Huvixa ombovai:

— Ha'e va'e ma heko porã va'e vy mba'emo porã omombe'u 'rã ouvy — he'i.

**28** Ha'e gui ma Aimaás ovaẽ vy ojapukai huvixa pe:

— Ha'evepa rei! — he'i vy huvixa renonde ojero'a ngova yvy re omovaẽ peve. Ha'e vy aipoe'ive ju:

— Ta'ima'endu'a porãa SENHOR Nderuete re, mba'eta nhandepo py omboaxapa xeruvixa rovai opu'ã va'ekue — he'i.

**29** Huvixa oporandu:

— Oiko porã pa xera'y Absalão?

Aimaás ombovai:

— Ha'e rami avi xeruvixa, xee ma nerembiguai Joabe xembou ma jave aexa nhomoanha-anha ha'e hevovo rei va'eri xee ndaikuaai guive mba'e paa — he'i.

**30** Huvixa aipoe'i:

— Apy he'ã, earõ ranhe — he'i ramo oarõ ho'amy ha'e py.

**31** Ha'e gui Etiópia pygua ju ovaẽ vy aipoe'i:

— Xeruvixa, mba'emo porã aru neremiendurã. Ange ma SENHOR nderepy nderovai opu'ã va'ekue po'akaa gui — he'i.

**32** Ha'e ramo huvixa oporandu Etiópia pygua pe:

— Oiko porã pa xera'y Absalão?

Etiópia pygua ombovai:

— Xeruvixa, tove ha'e va'e oiko vaiague ramigua toiko nderovaigua kuery ha'e javi re, ndevy ojapo vai aguã opu'ã va'ekue ma guive rã — he'i.

**33** Ha'e rami rã huvixa opy'a py onhenhandu vai ete vy ojepe'a ovy tetã kora rokẽ áry opy ja'o oĩ va'e py oĩ aguã. Ha'e vy ojae'o. Oguata vy ojevy-jevy oikovya rupi aipoe'i:

— Xera'y Absalão, xera'y, xera'y Absalão!  
Nderekovia xee amano 'rāgue teī, Absalão xera'y,  
xera'y!

## 19

### *Davi pe Joabe ijayvuague*

<sup>1</sup> Ha'e gui ma Joabe pe aipo'ea:

— Ma'ē, huvixa tu ojae'o rima oikovy gua'y Absalão re ipy'a vaia rupi — 'ea.

<sup>2</sup> Ha'e rami py ha'e va'e ára ha'e kuery ipo'aka teī iporiaupa okuapy, “Huvixa ma gua'y Absalão re ipy'a vai” 'ea ramo.

<sup>3</sup> Ha'e va'e árave ha'e kuery nda'evei reve oike ju okuapy tetā py, joe opu'āa gui oxīmba rei vy onha ya'e rami.

<sup>4</sup> Huvixa Davi ma oakā ojao'ipa reve ojapukai ratā:  
— Xera'y Absalão, Absalão xera'y, xera'y! — he'i oikovy.

<sup>5</sup> Ha'e ramo Joabe ma huvixa oīa py oike vy aipoe'i ixupe:

— Aŷ ma rejapo nerembiguai kuery ha'e javi oxīmba aguā rami, ha'e kuery ange nderekove ogueraa jepe rire teī, ha'e ndera'y ha'e nderajy kuery rekove, ha'e ndera'yxy ha'e ndera'yxy jevy kuery rekove guive.

<sup>6</sup> Ndee ma nhi'ā reayvu ndere ija'e e'ŷ va'e kuery, ha'e rā nderayvua kuery ma remomboriau rive. Aŷ ma xee aikuaa rā ange Absalão nomanoi, ha'e rā ore kuery ma romanomba va'e rire revy'a 'rāgue.

<sup>7</sup> Epu'ā ke aŷ, eē, ha'e ndeayvu nerembiguai kuery ipy'a porā ju aguā rami. Xee ma Nhanderuete rery rupi aura vy aipoa'e: Aŷ ndeayvu aguā nereēi ri

ramo ndereve neĩ peteĩ'i ava ma voi ndopytavei 'rã kova'e pyávy. Nekunumi guive aÿ peve rejex-avaiaty gui ma ha'e nunga nda'eveive 'rã ndevy – he'i.

<sup>8</sup> Ha'e rami rã huvixa opu'ã vy oguejy tetã kora rokẽ py oguapy oiny. Ha'e rã heta va'e kuery ha'e javi pe omombe'ua vy

— Ne'exa, huvixa ma okẽ py hiny — 'ea rã ha'e kuery ha'e javi ou vy ojexa uka okuapy huvixa renonde.

Ha'e rã Israel kuery ma onhamba ma voi, peteĩ-teĩ ngoo katy.

<sup>9</sup> Ha'e rami vy Israel kuery ha'e javi regua joupe-upu ijayvu okuapy, ha'e vy aipoe'i:

— Huvixa ma nhanderovaigua ha'e filisteu kuery po gui nhandereraa jepe va'ekue ri oyvy gui ae onha va'ekue Absalão káuxa.

<sup>10</sup> Ha'e rami teĩ Absalão nhanderuvixarã nhamoĩ va'ekue ma joe opu'ãa py omano. Aÿ ka, mba'e re tu pekyrirí ri? Pejapo 'rãgue huvixa ojevy ju aguã rami.

### *Jerusalém tetã katy Davi ojevyague*

<sup>11</sup> Israel kuery ha'e rami joupe-upu ijayvua omombe'upaa ma huvixa Davi pe. Ha'e ramo huvixa aipoe'i uka sacerdote kuery Zadoque ha'e Abiatar pe:

— Aipopeje ke Judá regua nhomongetaa kuery ikuai va'e pe: "Mba'e re tu peẽ kuery gui amboae kuery ha'e javi ranhe ogueru ju 'rã huvixa hekoapu?"

<sup>12</sup> Peẽ kuery ma xeryvy kuery ae'i, xekãgue ha'e xero'o regua'i ae peiko. Mba'e re tu ha'vy peẽ

kuery gui amboae regua kuery ranhe xereru jevy ta?" peje.

**13** Ha'e gui Amasa pe ma aipopeje: "Ndee nda'u xero'o ha'e xekāgue regua ae'i e'ŷ avi? Xevygua xondaro kuery ruvixa Joabe rekovia ndee romoĩ e'ŷ ramo Nhanderuete taxembopaga ha'e oipotaa rami" peje.

**14** Ha'e rami huvixa ijayvua Judá regua avakue oendu vy peteĩ'i rami ov'y'a okuapy op'y'a py. Ha'e vy aipoe'i uka okuapy ixupe:

— Oreruvixa, ejevy ju nerembiguai kuery ha'e javi reve — he'i uka.

**15** Ha'e ramo huvixa ojevy vy Jordão yakã peve ranhe ovaẽ. Ha'e rã Judá kuery avi Gilgal py oje'oi huvixa reve nhovaexí aguã, Jordão yakã ogueroaxa heruvy aguã.

### *Davi reve Simei nhovaexīague*

**16** Ha'e gui Gera ra'y Simei, Benjamim regua Baurim pygua va'e ojapura ov'y vy Judá regua avakue rupive oguejy, huvixa Davi reve nhovaexí avi aguã.\*

**17** Ha'e va'e reve oo avi mil xondaro kuery Benjamim regua. Saul ro pygua kuery rembiguai Ziba oo avi, gua'y kuery quinze ha'e guembiguai vinte va'e reve. Ha'e kuery jogueraa pojava Jordão yakã py huvixa pe ojexa uka vy.

**18** Ha'e rami vy ha'e kuery yy oaxapa huvixa ro pygua kuery ogueroaxa ju heruvy aguã, ha'e ixupe ojapo aguã oipotaa rami rei.

\* **19:16** Simei ma Jerusalém gui Davi onha jave ixupe ijayvu vai, ha'e hexe ita omombo va'ekue (2 Samuel 16.5-14).

Gera ra'y Simei ma huvixa renonde oĩ gue-napy'ã re, huvixa Jordão yakã oaxa ta ramo.

**19** Ha'e vy aipoe'i ixupe:

— Xeruvixa, xembopaga eme ajejavyague re, nema'endu'a eme xee nerembiguai xe'arandu e'ŷa rupi ajapo vaiague re, Jerusalém gui reoa ára. Xeruvixa, nema'endu'ave eme ha'e nungakue re ndepy'a py.

**20** Mba'eta xee nerembiguai va'e aŷ anhemombe'upa ajejavyague. Ha'e rami vy ae xeruvixa, José ramymino kuery gui xee ranhe aju rovaexĩ aguã — he'i.

**21** Ha'e ramo Zeruia pi'a Abisai aipoe'i:

— Simei nomanoi 'rã ri nda'u huvixarã SENHOR omoĩ va'ekue pe ijayvu vaiague re?

**22** Ha'e rã Davi ombovai:

— Mba'e tu xee areko peẽ Zeruia pi'a kuery reve? Mba'e re tu aŷ penhemoingo xerovaiguarã? Aŷ nda'u Israel regua omano ta? Tyrã pa xee ndaikuaai teve Israel kuery ruvixa ju aĩa? — he'i

**23** Ha'e gui Simei pe ju huvixa oura vy

— Ndee neremanoi 'rã — he'i.

### *Davi reve Mefibosete nhovaex̃ague*

**24** Saul ramymino Mefibosete voi oo huvixa reve nhovaexĩ aguã. Ha'e va'e ma huvixa ooa ára guive ojevy porãá ára peve ndojepyeivei, nonhendyva apoi, neĩ oao voi ndojoivei va'ekue.

**25** Ha'e gui Jerusalém py huvixa ovaẽ ramo hexeve Mefibosete nhovaexĩ aguã ou ramo huvixa aipoe'i:

— Mefibosete, mba'e re tu ndereoi raka'e xerupive?

**26** Ombovai:

— Xeruvixa, xerembiguai xembotavy ramo ndaai. Mba'eta xee nerembiguai aguata porã e'ŷ va'e vy aipoa'e teĩ: “Ambokupe árygua uka 'rã xerymba huvixa rupive aa aguã”, ha'e va'ekue.

<sup>27</sup> Ha'e rami teĩ xeruvixa, xerembiguai ma nerendonde ijayvu rei xere.<sup>†</sup> Ha'e rami avi xeruvixa, ndee ma Nhanderuetea guigua anjo rami reikuaapa va'e. Xererekko ke ndee reipotaa rami.

<sup>28</sup> Ha'e gui xeruvixa, ha'evea rami 'rãgue xeru ro py ikuai va'ekue rejuka ukapa va'e rire. Ha'e rami teĩ ndee xereru imoiny nde-mesa py okaru va'e kuery mbyte. Ha'e nunga rupi xeruvixa, nda'evei mba'emo re rive xee ajerure aguã ndevy – he'i.

<sup>29</sup> Ha'e rã huvixa ombovai:

— Ha'eve ma. Mba'e re tu ha'e nunga re teri ndeayvu? Xeayvu Ziba reve pemboja'o pendeyvy.

<sup>30</sup> Mefibosete aipoe'i huvixa pe:

— Ixupe ae toptyapa, xeruvixa, ndero py rejevy porã ma rire.

### *Davi reve Barzilai nhovaex̃ague*

<sup>31</sup> Ha'e gui Gileade pygua Barzilai voi Rogelim gui ou vy huvixa reve oaxa Jordão yakã, yy rovai re peve.

<sup>32</sup> Barzilai ma tuja'i ete, oitenta ma'etŷ ma oguerekva'e. Ha'e ae huvixa kuery pe ome'ẽ va'ekue ho'u va'erã Maanaim py ikuai jave, ava oguerekopa va'e vy.\*

---

<sup>†</sup> **19:27** Mefibosete ma Saul ra'y Jônatas ra'ykue, hexe Davi opena porã va'ekue Jônatas re ima'endu'a vy. Hembiguai ma Ziba (9.1-13). Ha'e gui Ziba ma Mefibosete rekokue ramigua rive omombe'u va'ekue Davi pe, ijyvy ojeupe guarã ae ojopyxe vy (16.1-4). \* **19:32** 2 Samuel 17.27-29

**33** Ha'e gui huvixa aipoe'i Barzilai pe:

— Jaa ke xerupive, Jerusalém tetā py xee ame'ẽ 'rā nerembi'urā.

**34** Barzilai ombovai huvixa pe:

— Mbovy ára peve teri nda'u aiko 'rā? Nda'evei teve ndee xeruvixa reve aa aguã Jerusalém peve.

**35** Oitenta ma'etý ma xee areko. Ndaikuaavei ma mba'e nunga pa iporā va'e, ha'e'ý vy iporā e'ý va'ea voi. Tembi'u ha'u va'e voi naendu kuaavei ma heea, ha'u va'e ha'e ay'u va'e voi. Xee nda'u aendu kuaa teri 'rā avakue ha'e kunhague oporaei rā? Xeruvixa, mba'erā tu xee nerembiguai romoingo eta rei rive ta?

**36** Ha'e rami avi xeruvixa, ndereve xee aa 'rā Jordão yakā rovai peve'i. Mba'e re tu ndee remboekovia ta mba'emo porā ndevy ajapoague?

**37** Tove xee nerembiguai taa ju, ha'e vy xerekaoa py ae amano'i 'rā xeru ha'e ha'i kuery rupa katy'i xenhono porā aguã. Ha'e rami avi ne'exa, Quimã toĩ nerembiguairā. Xeruvixa, toaxa ha'e ae nderupive, ha'e rā rerekoo 'rā reipotaa rami — he'i.

**38** Huvixa ombovai:

— Toaxa ha'vy Quimã xereve, ha'e ixupe ajapo 'rā reipotaa rami tema. Ndevy voi ajapo 'rā reipota va'e ha'e javi — he'i.

**39** Pavē rei Jordão yakā oaxapa ramo huvixa voi oaxa ma vy oayvupa Barzilai rova py, ha'e vy ogueroayvu porā imondovy. Ha'e rā Barzilai ojevy ju ngoo katy.

**40** Gilgal peve huvixa oaxa ov y ramo Quimã oo avi oiny hupive. Huvixa rupive oje'oi avi Judá regua kuery ha'e javi, ha'e Israel regua mbyte rupi peve.

**41** Ha'e gui Israel regua avakue ha'e javi oupa okuapy huvixaa py. Ha'e vy aipoe'i okuapy ixupe:

— Oreruvixa, mba'e re tu oreryvy kuery gui Judá regua ranhe rive ndereru nhemi okuapy? Mba'eta Jordão yakā kyvōgua re ha'e kuery ndereru ndero pygua kuery reve, nerembiguai kuery ha'e javi avi — he'i.<sup>‡</sup>

**42** Ha'e ramo Judá regua avakue ha'e javi ombovai Israel kuery pe:

— Ha'e rami rojapo mba'eta huvixa ma oreretarā ae. Mba'e re tu ha'e rami rā rive pendevai ta? Ore kuery nda'u huvixa rembi'u re rokaru, tyrā pa orevy mba'emo ome'ẽ rive va'ekue?

**43** Ha'e gui avakue Israel kuery ombovai ju Judá kuery pe:

— Ore kuery ma pendegui dez-kue oreretave va'e vy peẽ kuery gui roguerekove Davi reve. Mba'e re tu ha'vy peẽ kuery norembovareive? Ore kuery ranhe oreayvu raka'e nhanderuvixa rogueru jevy aguã re — he'i teĩ Israel kuery ijayvua gui Judá kuery ijayvu poyive tema.

## 20

### *Seba huvixa rovai opu'ã rā ojukaa ague*

**1** Ha'e py oĩ avi peteĩ ava nhe'ẽ vai ra'y Seba hery va'e, Bicri ra'y, Benjamim regua va'e. Ha'e va'e ma mimby guaxu omonhe'ẽ vy aipoe'i:

— Nhande kuery ma mba'eve ndajarekoi Jessé ra'y Davi reve. Israel kuery, peteĩ-teĩ jaje'oi nhanderoko! — he'i.

---

<sup>‡</sup> **19:41** Apy “Israel kuery” he'ia ma Judá regua e'ŷ re ijayvu vy. Ha'e rā amboae py ma jaikuua 'rā judeu kuery ha'e javi re ijayvua.

<sup>2</sup> Ha'e ramo Israel regua avakue ha'e javi oja'o jogueravy Davi-a gui, Bicri ra'y Seba rupive anho oje'oi. Ha'e rã Judá regua kuery ma huvixa reve tema ikuai, ha'e vy Jordão yakã guive ogueru okuapy Jerusalém peve.

<sup>3</sup> Jerusalém tetã py ngoo oĩ va'e py Davi ovaẽ vy ogueraapa dez gua'xyy jevy oguerekó va'ekue ngoo re opena va'erã oeja va'ekue. Ha'e va'e kuery ma ombotypa vy omongaru uka porã va'eri neĩ teĩ reve nonhenovei. Ha'e kuery omano e'ÿa ja oo omboty pyre py ikuai imeve'ÿ va'e rami ae.

<sup>4</sup> Ha'e gui Davi aipoe'i Amasa pe:

— Mboapy araa py emboatypa ke xea py Judá regua avakue, ha'e ndee voi eju ju apy rejexa uka aguã — he'i.

<sup>5</sup> Ha'e ramo Amasa oo Judá regua avakue oguerupa aguã, teĩ ou ju e'ÿ re ára oa'angaague oaxa rive.

<sup>6</sup> Ha'e ramo Abisai pe ju Davi aipoe'i:

— Aÿ Absalão ojapoague gui Seba ojapo vaive 'rã nhandevy. Ha'e rami vy eraapa na xerembiguai kuery, ha'e pemonha, tetã ikorapa va'e py onhemí vy nhandegui oo jepe e'ÿ aguã — he'i.

<sup>7</sup> Ha'e ramo Joabe reveguia kuery ma Jerusalém gui kuery oje'opia Bicri ra'y Seba omonha vy, huvixa rarõa ha'e xondaro kuery ipy'a guaxukue ha'e javi reve.

<sup>8</sup> Ha'e gui Gibeão katy'i ita tuvixa va'e hi'aña py ha'e kuery ovaẽmba jave ma Amasa ovaexí ouvy. Joabe ma xondaro kuery ao py onhemonde ho'amy ha'e py. Hi'áry ku'akuaa oĩ va'e reve kyxe avi oĩ hyru py. Ovaexí ovy vy oity kyxe.

<sup>9</sup> Ha'e vy Amasa pe Joabe

— Xeryvy, reiko porã'i pa? — he'i reve hendyva re ojopy oiporu kuaa regua py, oayvu aguã merami.

<sup>10</sup> Ha'e rã Amasa neî ndoikuua potai Joabe opo rovai py kyxé oguerekoa re. Ha'e rã ha'e va'e py ae oye'o, hyekue onhoëmba. Teïgue ju oikyxí e'ÿ re omano ha'e pyve. Ha'e ramo guyvy Abisai reve Joabe omonhave ju jogueravy Bicri ra'y Seba.

<sup>11</sup> Joabe reve ikuai va'e regua peteñ ma Amasa retekue yvýry hi'añ vy aipoe'i:

— Joabe revedua Davi-a katyguia peiko va'e ma jaa ke Joabe rupive — he'i.

<sup>12</sup> Tape mbyte rupi Amasa nguguy re omyí teri oupy ramo oexa va'e nhavõ opyta kuerei 'rã. Ha'e nunga rupi xondaro va'e oexa vy tape mbyte gui oguerovave heravy Amasa retekue nhuündy katy. Ha'e vy hi'áry omombo peteñ ao puku, ituia py ovaë va'e nhavõ opyta ramo.

<sup>13</sup> Tape gui oguerova ma rire avakue ha'e javi oo Joabe rupive, Bicri ra'y Seba rakykue monha vy.

<sup>14</sup> Seba kuery ma Israel ha'e javi regua ikuiaia rupi oaxapa jogueravy, Abel-Bete-Maaca peve. Ha'e rami teñ berita kuery anho onhemboatypa vy oje'oi hupive.

<sup>15</sup> Ha'e gui Joabe oxondaro kuery reve ovaëmba vy ojoko imoiny Abel-Bete-Maaca tetã. Ha'e va'e tetã katy'i omboaty reta yvy, tetã kora yvatekuea peve. Ha'e javi Joabe reve ikuai va'e ojo'o-jo'o okuapy tetã kora oity aguã.

<sup>16</sup> Ha'e gui ma tetã gui peteñ kunha hi'arandu va'e ojapukai:

— Pendu ke, pendu ke. Aipopeje Joabe pe tou kyvõ katy, hexeve xeayvu aguã.

**17** Ha'e va'e ovaẽ ramove kunha va'e oporandu:

— Ndee ae pa Joabe?

Ombovai:

— Xee ae — he'i.

Ha'e rã kunha va'e aipoe'i:

— Endu ke xee nerembiguai xeayvua.

— Aendu 'rã — he'i Joabe.

**18** Ha'e rã kunha va'e aipoe'ive ju:

— Yma guive aipo'ea: “Penhemoneta uka 'rã Abel py, mba'emo perekó va'e re oikuaa pota porãa aguã” 'ea.

**19** Ha'e rami ae xee ma Israel kuery joe opu'ã va'e regua e'ŷ, ore kuery ma ojeroviapy meme. Ha'e rã ndee ma rembovaipaxe peteĩ tetã, xee Israel regua xy aiko va'eri. Mba'e re tu oremokanhy ta SENHOR pegua orekuai va'e?

**20** Joabe ombovai vy aipoe'i:

— Xee ma namokanhyi 'rãe, nambovaipavei 'rã guive.

**21** Ndee rexã'ãa rami e'ŷ aikoa. Ha'e rami avi peteĩ ava Efraim yvyty re oiko va'e, Bicri ra'y Seba hery va'e, opu'ã karamboae huvixa Davi rovai. Ha'e va'e anho'i pemboaxa xevy, ha'e ramo ajepe'a ju 'rã peneretã gui — he'i.

Ha'e rã kunha va'e aipoe'i Joabe pe:

— Ma'ẽ, inhakãgue amombo uka 'rã ndevy tetã kora áry rupi.

**22** Ha'e gui kunha va'e o'arandua rupi oo guetarã kuery ha'e javi reve jogueroayvu aguã. Ha'e rire Bicri ra'y Seba akã ojaya okuapy vy omombo Joabe oexa aguã. Ha'e rã omonhe'ẽ mimby guaxu, ha'e ramo ojepe'apa ju tetã gui. Peteĩ-teĩ ngoo katy

ju oje'oi. Ha'e rã Joabe ma Jerusalém katy ojevy huvixa reve jogueroayvu aguã.

*2 Samuel 8.15-18; 1 Crônicas 18.14-17*

**23** Joabe ma Israel regua xondaro kuery ha'e javi re opena va'e. Ha'e rã Joiada ra'y Benaia ma huvixa rarõa kuery re opena.

**24** Adorão ma omomba'eapo nhea'ãmby kuery re opena. Ha'e rã Ailude ra'y Josafá ma mba'emo oiko va'ekue mboparaa ae.

**25** Seva ma kuaxia re opena va'ety. Zadoque ha'e Abiatar ma sacerdote ikuai.

**26** Ha'e gui Jair ramymino Ira ma Davi mongetaaty oiko.

## 21

*Gibeão pygua kuery ojepy okuapyague*

**1** Davi oĩ jave oiko karuai mboapy ma'etý re. Ha'e rã SENHOR pe Davi oporandu rã aipoe'i ixupe:

— Ha'e rami oiko mba'eta Saul ha'e hoo pygua kuery jouguy omoëague re ndopagai teri, Gibeão pygua kuery regua ojukaague re guive — he'i.

**2** Ha'e rami rã Gibeão pygua kuery huvixa oenoĩ uka vy ijayvu ha'e kuery reve. Gibeão pygua ma Israel regua e'ý, amorreu regua rembyrekue ae. Ha'e gui Israel kuery oura ma voi va'ekue omomba e'ý aguã re, va'eri Saul ma omombaxe Israel ha'e Judá kuery re nda'evei ete vy.\*

**3** Ha'e gui Davi oporandu Gibeão pygua kuery pe:

\* **21:2** Gibeão regua kuery reve Josué jogueroayvuague rami vy Israel kuery pe omomba'eapo 'rã avave rei ojukaa e'ý re (Josué 9).

— Mba'e tu peipota ajapo pendevy kuery pe? Mba'e nunga tu ame'ẽ 'rã pendevy teko vai ojapoague rekovia, SENHOR pegua kuery peroayvu porã aguã?

<sup>4</sup> Gibeão regua kuery ombovai okuapy:

— Saul ha'e hoo pygua kuery mba'e prata ha'e ouro ma ndoroipotai. Israel regua ndorojukaxeí guive peteïve — he'i.

Davi oporanduve ju:

— Mba'e nunga tu ha'vy tajapo pendevy kuery pe?

<sup>5</sup> Ha'e kuery ombovai huvixa pe:

— Ha'e gui oreregua kuery jukaare, Israel mbyte rupi roikove e'ŷ aguã oremokanhymbaxe va'ekue,

<sup>6</sup> ha'e va'e ra'y kuery regua gui emboaxa orevy sete avakue SENHOR renonde rojyryvipy aguã, Gibeá SENHOR rembiporavo Saul rekoague py ae — he'i.

Ha'e ramo huvixa aipoe'i:

— Xee amboaxa 'rã pendevy — he'i.

<sup>7</sup> Ha'e rã Jônatas ra'y Mefibosete Saul ramymimo va'e ma huvixa nomboaxai, SENHOR rery rupi Saul ra'y Jônatas reve SENHOR Davi ouraague rami vy.

<sup>8</sup> Ha'e rami vy huvixa ojopy Saul ra'y kuery Aiá rajy Rispa pi'a mokoïve, Armoni ha'e Mefibosete hery va'e, ha'e gui Saul rajy Merabe pi'a kuery peteï nhiruïve, meolatita Barzilai ra'y Adriel ra'y kuery ikuai va'e.

<sup>9</sup> Ha'e va'e kuery ma Gibeão pygua kuery po py omboaxa yvy'ã áry ojyryvipy aguã, SENHOR renonde. Ha'e rã sete-ve ho'apa vyvoi. Ha'e vy omano, mba'emo mono'õa ypy'ia ára, jypy cevada omono'õa ára py ae.

<sup>10</sup> Ha'e ramo Aiá rajy Rispa ma peteī ajukue voxá guigua ogueraa vy peteī ita tuvixa va'e áry oipyo imoiny oī aguā. Ha'e py ma jypy omono'ōa ára guive opyta yva gui oky ho'a ju peve. Ha'e va'e ma ara py neī pyávy ndoejai oikovy tetekue ikuiai py guyra oveve va'e onhemboja aguā, mymba ka'aguy rupigua guive.

<sup>11</sup> Davi pe omombe'ua Saul ra'yxy jevy Rispa oikoa ha'e javi, Aiá rajy va'e.

<sup>12</sup> Ha'e rami rā Davi oo vy Jabel-Gileade gui ogueru Saul ha'e ta'y Jônatas kāgue, ha'e pygua kuery Bete-Seā tetā mbyte gui ogueraa rire. Ha'e py ma Gilboa yvyty re filisteu kuery Saul ojukaa ára py oeja imoiny va'ekue.

<sup>13</sup> Ha'e kuery po gui Saul ha'e ta'y Jônatas kāgue ogueru vy ha'e va'e reve onhono porā avi ojyryvipy pyre kāgue.

<sup>14</sup> Ha'e rami vy Benjamim regua yvy re ojaty okuapy Saul ha'e ta'y Jônatas kāgue, Zela py, tuu Quis onhono porāague py ae. Huvixa ojapo ukaa rami ojapopa. Ha'e va'e rire ma ha'e va'e yvy re Nhanderuete ojapo porā ju.

#### *1 Crônicas 20.4-8*

<sup>15</sup> Ha'e gui filisteu kuery opu'ā ju okuapy Israel kuery rovai. Ha'e rā Davi oxondaro kuery reve oje'oi vy joguero'a filisteu kuery reve. Ha'e gui ma Davi ikane'ō vaipa.

<sup>16</sup> Isbi-Benobe ma gigante ramymino regua. Hu'y guaxu oguereko va'e ma cinco quilos ipoyi va'e, ha'e onhemonde oikovy hu'y jokoa regua ipyaukue py. Ha'e va'e ma ojukaxe Davi.

<sup>17</sup> Ha'e rami teī Zeruia pi'a Abisai oepy vy filisteu oipyxo vy ojuka. Ha'e ramo Davi pegua kuery

ixupe oura vy aipoe'i okuapy:

— Aŷ gui ma orereve ndee ndereovei 'rã joe ropu'ã aguã katy, Israel kuery moexakãa ogue e'ý aguã — he'i okuapy.

<sup>18</sup> Ha'e va'e rire ma joguero'ave ju Gobe py, filisteu kuery reve. Ha'e py ma husatita Sibecai va'e ojuka gigante ramymino Safe.

<sup>19</sup> Ha'e va'e rire teĩgue ju joguero'a filisteu kuery rovai Gobe py. Ha'e gui Belém pygua Jaaré-Oregim ra'y Elanã ojuka Gate pygua Golias. Ha'e va'e guembiporu hu'y guaxu oguereco va'ekue ma ajukue popẽa'y rami tuvixa va'e.\*

<sup>20</sup> Teĩgue ju opu'ã okuapy joe, Gate py ae. Ha'e py oiko peteĩ ava yvate ete va'e. Ha'e va'e ma mboapy meme ikuã ha'e ipyxã voi, ha'e javi vy vinte e quattro ikuã ha'e ipyxã oguereco. Ha'e va'e voi gigante ramymino regua.

<sup>21</sup> Ha'e va'e ma Israel kuery mbojaru reia rupi ijayvu ramo Davi ryke'y Simei ra'y Jônatas ojuka.

<sup>22</sup> Ha'e va'e avakue irundy ikuai gigante ramymino Gate tetã py. Ha'e rami teĩ Davi ha'e ixondaro kuery oitypa raka'e.

## 22

### Salmo 18.1-50

<sup>1</sup> Ha'e gui SENHOR pe Davi ijayvu kova'e mboraei rupi, Saul ha'e hovaigua kuery ha'e javi po gui SENHOR ogueraa jepe jave.

<sup>2</sup> Ha'e vy aipoe'i:

— SENHOR, ndee ma xe'itaova.

Ndee ma oo imbaraete va'e ha'e xerepya.

<sup>3</sup> Xeruete ma xe'itaova anhemiaty,

---

\* <sup>21:19</sup> 1 Crônicas 20:5

mba'emo vai jokoa, xereraa jepea imbaraete  
 va'e,  
 oo yvate va'e, ha'e anhemiaty.  
 Ndee Xeruete, xereraa jepe 'rā xejukaxeа  
 kuery gui.

- <sup>4</sup> Ajapukai SENHOR ogueroporaеipy va'e pe.  
 Ha'e rami vy aa jepe 'rā xerovaigua kuery gui.
- <sup>5</sup> Manoa pygua xejoko va'ekue yai rami,  
 heko vai va'e yai rami xere opu'ā vy xe-  
 monyje.
- <sup>6</sup> Manoa pygua xejokua va'ekue,  
 nhu'ā xā xejura xapy'a.
- <sup>7</sup> Ha'e ramo ajexavaia py ajapukai karamboae  
 SENHOR pe.  
 Xeruete pe ajapukai ainy.  
 Ha'e rā ojeupagua templo gui oendu xeayvua,  
 ijapyxa peve ajapukaia ovaē ramo.
- <sup>8</sup> Ha'e ramo yvy omyī ha'e oryryi.  
 Yva yta ikuai va'e voi ovavapa, oryryipa,  
 ogueropoxy ramo.
- <sup>9</sup> Inhapyīguа gui opu'ā hataxī,  
 ijuru gui ma tata nhomombaарā oē,  
 tapyī hexakā va'e.
- <sup>10</sup> Yva omo'yvyī vy oguejy,  
 ipy guýry ptyū vaikue oī reve.
- <sup>11</sup> Peteī anjo ipepo va'e áry oī vy oveve ouvy,  
 yvytu opepo áry ogueru pojava ramo.
- <sup>12</sup> Oyvýry rupi rami omoī ptyū reia oo'irā,  
 ptyū, yy ijatya ha'e yva re arai ikuai va'e voi.
- <sup>13</sup> Hexakāa henonde oo va'e gui  
 hendy ov yvy tapyī rexakā ramigua.
- <sup>14</sup> Ha'e gui SENHOR yapu yva re,  
 Yvate ete va'e ijayvu atā.

- <sup>15</sup> Ngu'y omombo vy omaimba xerovaigua kuery.  
Overa vy omondyipa.
- <sup>16</sup> Ha'e ramo ojekuaa yy rupa,  
ha'e vvy yta avi ojekuaapa,  
ndeayvu atāa py SENHOR,  
ndepoxya rupi neapyīgua gui nepytue ramo.
- <sup>17</sup> Yvate gui ha'e okuave'ē vy xejopy,  
xerenoē yy tuvixa va'e gui.
- <sup>18</sup> Xereraa jepe xerovaigua kuery imbaraete va'e  
gui,  
xemomboriau rei va'e kuery gui ae,  
xegui ipo'akave ete va'ekue ri.
- <sup>19</sup> Xere ha'e kuery opu'āmba rei ajexavai jave,  
teī SENHOR onhemoī xepytyvōarā.
- <sup>20</sup> Ha'e rami vy xereru peteī henda ipa'ū ja'eavea  
py.  
Xereraa jepe xererovy'a vy.
- <sup>21</sup> Xerekoko porāa re SENHOR xererekoko porā,  
xevy pe ome'ē ndaxepo ky'aiague repy.
- <sup>22</sup> Mba'eta xee ma SENHOR guigua tape rupi aiko  
va'e,  
ndajep'eai Xeruete gui ha'eve'ŷa rami aiko  
aguā.
- <sup>23</sup> Xejee amoī ijayvuague ha'e javi,  
xejegui ndaip'eai ayvu omoī va'ekue.
- <sup>24</sup> Henonde aiko anhetēa rupi,  
ajejoko teko vai rupi aiko e'ŷ aguā.
- <sup>25</sup> Ha'e ramo SENHOR ome'ē xerekoko porāague repy,  
henonde rupi ndaxerekoko ky'ai rire.
- <sup>26</sup> Heko porā va'e kuery pe rejekuaa uka 'rā heko  
porā va'e,  
anhetē rupi ikuai va'e pe rejekuaa uka anhetē  
rupigua avi,

- 27 iky'a e'ŷ va'e pe rejekuaa uka iky'a e'ŷ va'e,  
     ha'e rā heko vai va'e pe ma rejekuaa uka 'rā  
     nhombopaga kuaa va'e.
- 28 Ndee reraa jepe 'rā onhemo'yvyi'i va'e,  
     ha'e rā oma'ẽ vaikue reia rupi onhembovate  
     va'e ma remomba 'rā.
- 29 Ndee SENHOR ma xerexapea,  
     SENHOR omoexakā pytū rupi aiko rā.
- 30 Ndereve vy amomba 'rā xondaro kuery,  
     Xeruete reve vy apo 'rā hetā kora áry rupi.
- 31 Nhanderuete guigua tape ma iky'a e'ŷ va'e,  
     SENHOR ayvu ma oa'anga pyre.  
     Hexe onhemi va'e ha'e javi pe ma mba'emo vai  
     jokoa oiko.
- 32 Mava'e tu Nhanderuete oiko SENHOR e'ŷ vy?  
     Mava'e tu nhande'itaova oiko Nhanderuete  
     e'ŷ vy?
- 33 Nhanderuete ma xemombaraetae xekangy e'ŷ  
     aguā,  
     omoatyrō 'rā aguata aguā rupi.
- 34 Ha'e ojapo xepy guaxu rami inhakuā aguā.  
     Ha'e vy yvatea rupi xemoingo.
- 35 Xepo pe voi ome'ẽ joe apu'ã kuaa aguā.  
     Ha'e ramo guyrapa overa va'e guigua voi  
     aipira 'rā.
- 36 Mba'emo vai jokoarā reme'ẽ xereraa jepea,  
     xemboaxyra rupi xembovate.
- 37 Apyrō aguā tape rembopyve ramo  
     ndaxepyxyryi 'rā.
- 38 Xerovaigua kuery amonha 'rā aupity peve.  
     Amomba rire ma ajevy ju.
- 39 Amomba ae, amou'ũmba opu'ã aguā nda'evevei  
     peve.

Xepy yvýry ho'apa.

<sup>40</sup> Mba'eta ndee xemombarae te ajoguero'a kuaa  
aguã,  
rejapo xere opu'ã va'ekue re xepo'aka aguã  
rami.

<sup>41</sup> Xerovaigua kuery rejapo ojavapa aguã rami.  
Xerayvu e'ÿ va'e amomba.

<sup>42</sup> Ha'e kuery oma'ẽ rã avave rei ndoepyai.  
Tá, SENHOR pe ha'e kuery ojapukai teñ nombo-  
vai.

<sup>43</sup> Ha'e ramo amongu'ipa yvy ku'i rami.  
Amou'üm̄ba, yapo tape guiguare rami  
amomba.

<sup>44</sup> Xeretã pygua kuery xere opu'aa gui xereraa  
jepe,  
xemoi yvy regua kuery ruvixarã.  
Amboae regua kuery ndaexai va'ety voi  
xevygua ikuai.

<sup>45</sup> Amboae regua kuery xenhe'ẽ rendu.  
Xeayvu oendu vy ojapopa okuapy.

<sup>46</sup> Ha'e gui amboae regua kuery okanhymba,  
onhemiague gui oëmba onhemondyipa vy.

<sup>47</sup> SENHOR ma oikove va'e, togueroayvu porãa  
xe'itaova!  
Tomboetea Xeruete, ita xereraa jepea.

<sup>48</sup> Nhanderuete xerepy vy jojukapa,  
heta va'e kuery re xembopo'aka.

<sup>49</sup> Nhanderuete ae xereraa jepe xerovaigua kuery  
gui.  
Ndee ma xemboyvate xerovaigua kuery áry,  
ha'e xerepy avakue jojuka va'ety po gui.

<sup>50</sup> Ha'e ramo SENHOR, rogueroovy'a 'rã yvy regua  
kuery oendua py,

aporaei 'rã nderery rupi.\*  
 51 Ha'e ae ombopo'aka 'rã huvixave omoĩ va'ekue,  
 oexa uka 'rã guembiporavo oayvua,  
 Davi ha'e hamymino kuery pe, raka'e rã peve.

## 23

### *Davi opa vygua ijayvuague*

- <sup>1</sup> Pova'e ayvu ma opa vygua Davi ijayvuague.  
 Jessé ra'y Davi ijayvua,  
 ava omboyvate pyre, Jacó kuery ruete omoĩ  
 va'ekue,  
 Israel regua ha'eve rei'ia rupi oporai va'e.  
<sup>2</sup> — SENHOR Nhe'ẽ ijayvu xejuru rupi,  
 ha'e ijayvua rupi ae xejuru omombe'u.  
<sup>3</sup> Israel kuery ruete ijayvu,  
 Itaova Israel kuery onhemiaty aipoe'i xevy:  
 “Teko porã rupi avakue re opena va'e,  
 SENHOR renonde ojererokyjea rupi joe opena  
 va'e ma  
<sup>4</sup> ko'ẽ aje'ive omoexakã ouvy va'e rami oiko,  
 ko'ẽ aje'ive nda'araivei jave kuaray ojope  
 ouvy va'e rami,  
 oky rire ojope ju vy mba'emo renhoĩ  
 ombo'okypa va'e rami”, he'i.  
<sup>5</sup> Ha'e rami e'ỹ ri pa Nhanderuete renonde xero  
 pygua kuery ikuai?  
 Mba'eta xereve ojapo ngupive guarã opa e'ỹ  
 va'erã,  
 ha'evea rami meme ae ojapo, ivaipa aguã  
 rami e'ỹ.  
 Ha'e rami vy ndojapoi avi 'rã teve aa jepe  
 aguã,

---

\* **22:50** Romanos 15.9

aupity aguã arõ aikovy va'e ha'e javi?

<sup>6</sup> Ha'e rã nhe'ẽ vai ra'y kuery ma oipe'apaa 'rã  
juu nhandepo py e'ŷ nhamondo va'e rami.

<sup>7</sup> Mba'eta amongue omondoxe vy  
oiporu 'rã ferro guigua, e'ŷ vy hu'y guaxu.  
Ha'e rire hi'aiaque pyve okai katuĩ'i 'rã tata py.

***1 Crônicas 11.10-47***

<sup>8</sup> Po rami ma Davi pegua ipy'a guaxukueve  
rery oĩ: Taquemoni ra'y Josebe-Bassebete ma  
mboapyve va'e kuery ruvixa. Ha'e va'e ma guem-  
biporu hu'y guaxu reve onhea'ã oikovy oitocentos  
avakue rovai, ha'e vy ojukapa vyvoi peteigue'i  
pyve.

<sup>9</sup> Ha'e va'e rire ma Dodô ra'y Eleazar, Aoí  
ramymino va'e. Ha'e va'e ma mboapyve ipy'a  
guaxukueve va'e regua oiko. Peteĩ ára Davi reve  
ha'e kuery ikuai vy filisteu kuery ijaty okuapy  
va'e ombovai okuapy joe opu'ã aguã. Israel kuery  
mboae ma ojepe'apa ma teĩ

<sup>10</sup> ha'e opu'ã vy onhea'ã filisteu kuery rovai, ipo  
kyxe ojopya haxypa peve. Ha'e va'e ára SENHOR  
ogueraa jepepa rã heta va'e kuery Eleazar opu'ã  
ho'amya py ojevypa ju mba'emo oeja pyre ojopy  
heravy aguã.

<sup>11</sup> Ha'e va'e rire ma Agé ra'y Samá, hararita va'e.  
Leí tekao py peteĩ mba'ety kumanda pe'i anho  
ikuiaia py filisteu kuery ijaty okuapy ramo ha'e  
kuery gui heta va'e kuery onhamba teĩ

<sup>12</sup> mba'ety mbyte py Samá hi'aĩ vy ojokopa. Ha'e  
rami vy ojukapa filisteu kuery. Ha'e rami py teigue  
ju SENHOR ogueraa jepepa.

<sup>13</sup> Ha'e gui trinta yvatekueve ikuai va'e regua  
mboapy ma mba'emo mono'õa ára oje'oi avi

Adulão itakua py Davi onhemia py. Ha'e va'e jave py filisteu regua xondaro kuery voi ijaty okuapy Refains yvyugua py.

<sup>14</sup> Ha'e rami vy Davi onhemia py oĩ, ha'e rã filisteu regua xondaro kuery ma Belém py ikuai.

<sup>15</sup> Ha'e gui Davi ijy'uvei etea rupi aipoe'i:

— Mava'e tu xemboy'u ta ygua Belém tetã kora rokẽ py oĩ va'e gui? — he'i ramo

<sup>16</sup> ha'e va'e mboapyve ipy'a guaxukueve ikuai va'e ma filisteu kuery ijaty okuapya mbyte rupi oaxa vy ygua Belém tetã rokẽ py oĩ va'e gui oguenoẽ yy, ha'e Davi oĩa py ogueru. Ha'e rã ha'e ndoy'uxei vy onhoẽ SENHOR renonde ome'ẽ mbyrã.

<sup>17</sup> Ha'e vy aipoe'i:

— SENHOR, nda'evei ete xee ha'e nunga ay'u aguã! Xee ay'u 'rã ri nda'u avakue ndojeayvuveikue py oje'oi va'ekue ruguy rami? — he'i vy ndoy'ui. Ha'e ramigua ae mboapy ipy'a guaxukueve ojapo va'ekue.

<sup>18</sup> Ha'e gui Joabe ryke'y Abisai, Zeruia pi'a va'e ma trinta ikuai va'e ruvixa. Ha'e va'e ma guembiporu hu'y guaxu reve opu'ã trezentos ikuai va'e rovai, ha'e vy ojukapa. Ha'e rami vy tenondegua mboapyve ikuai va'e rami ete ima'endu'a porãmby oiko.

<sup>19</sup> Ha'e ma trinta ikuai va'e gui omboetevepy vy ha'e kuery ruvixa oiko va'eri tenondegua mboapyve ikuai va'e regua e'ŷ guive.

<sup>20</sup> Ha'e gui Joiada ra'y Benaia ma ipy'a guaxuve va'e avi. Cabzeel pygua oiko, mba'emo tuvixa va'e ojapo avi va'e. Ha'e rami vy ojuka mokoĩ Moabe pygua joe opu'ã kuaave va'ekue. Yro'y apĩ ho'a

jave ma itakua py oguejy vy ojuka peteĩ guary okua py oĩ va'ekue.

<sup>21</sup> Ojuka avi peteĩ ava Egito guigua ipukuve va'ekue. Egito pygua ma hu'y guaxu reve ou rã Benaia popoka py rive opu'ã ovv vy ipo gui hu'y guaxu oguereko va'ekue oipe'a vy ha'e va'e py ae ju ojuka.

<sup>22</sup> Ha'e nunga Joiada ra'y Benaia ojapo rire mboapyve tenondegua ipy'a guaxukueve re rami ima'endu'a porãmby oiko.

<sup>23</sup> Ha'e va'e ma trinta ikuai va'e gui omboetevea va'eri mboapyve tenondegua regua ndoikoi guive. Ha'e gui Davi omoĩ guarõa kuery re opena va'era.

<sup>24</sup> Trinta ikuai va'e ma po rami hery: Joabe ryvy Asael, Belém pygua Dodô ra'y Elanã,

<sup>25</sup> ha'e gui Samá ha'e Elica harodita va'e meme,

<sup>26</sup> paltita va'e Heles, Tecoa pygua Iques ra'y Ira,

<sup>27</sup> Anatote pygua Abiezer, Mebunai husatita va'e,

<sup>28</sup> Zalmom aoíta va'e, Maarai netofatita va'e,

<sup>29</sup> Baaná netofatita va'e ra'y Helebe, Gibeá pygua Ribai ra'y Itai Benjamim regua va'e,

<sup>30</sup> Benaia piratonita va'e, Gaás yakã katygua Hidai,

<sup>31</sup> Abi-Albom arbatita va'e, Azmavete barumita va'e,

<sup>32</sup> Eliaba saalbonita va'e, Jasém ra'y kuery, Jônatas,

<sup>33</sup> Sama hararita va'e, Sarar ararita va'e ra'y Aião,

<sup>34</sup> Aasbai maacatita va'e ra'y Elifelete, Aitofel gilonita va'e ra'y Eliã,

<sup>35</sup> Hezrai carmelita va'e, Paarai arbita va'e,

<sup>36</sup> Zobá pygua Natã ra'y Jigeal, Bani gadita va'e,

<sup>37</sup> Zeleque amonita va'e, Naarai beerotita va'e, Zeruia pi'a Joabe rembiporu reraaty,

<sup>38</sup> Ira ha'e Garebe itrita va'e meme,

<sup>39</sup> ha'e gui Urias heteu va'e. Ha'e javi vy trinta e sete ikuai.

## 24

### *1 Crônicas 21.1-6*

<sup>1</sup> Ha'e gui teīgue ju SENHOR poxya hendy jevy Israel kuery rovai. Ha'e vy Davi py'a re omoī ha'e kuery rovai oiko aguā. Ha'e vy aipoe'i ixupe:

— Tereo eipapa Israel ha'e Judá kuery ha'e javi — he'i.

<sup>2</sup> Ha'e ramo huvixa Davi aipoe'i xondaro ruvixa Joabe pe:

— Eiko ke Israel regua ha'e javi ikuiaia rupi, Dã guive Berseba peve. Ha'e vy eipapapa, aikuua aguā mbovy pa ikuiaia.

<sup>3</sup> Joabe ombovai huvixa pe:

— Ha'e rami avi tove SENHOR Nderuete cem-kue ju tomboetave, ndee xeruvixa rexaa py. Ha'e rami teī xeruvixa, mba'e re tu ndee ha'e rami ete rejapoxe? — he'i.

<sup>4</sup> Ha'e rami teī huvixa ayvu Joabe ha'e xondaro ruvixa kuery ijayvua gui ipoyive ramo huvixa renonde gui Joabe ha'e xondaro ruvixa kuery oje'oi vy oipapa jogueravy Israel kuery ha'e javi.

<sup>5</sup> Ha'e rami vy ha'e kuery Jordão yakā oaxa vy opyta Aroer py Gade yvyugua mbyte py tetā oĩ va'e yke jaiporu kuaa regua katy. Ha'e vy oo Jazer katy.

<sup>6</sup> Ha'e gui ma Gileade katy oo vy ovaẽ Cades peve, heteu kuery yvy re. Ha'e gui Dã-Jaã katy oo vy ojeapa jogueravy Sidom katy.

<sup>7</sup> Ha'e vy ovaẽ Tiro tetā ikorapa va'e py, ha'e gui heteu ha'e cananeu kuery rekoa ha'e javi rupi. Ha'e gui oje'oi ju Judá regua Neguebe yvy katy Berseba peve.

**8** Ha'e rami py oguata jogueravy Israel yvy ha'e javi rupi.

Ha'e gui nove jaxyta vinte araa py ma ovaẽ ju okuapy Jerusalém py.

**9** Huvixa pe Joabe omombe'u heta va'e kuery mbovy pa ikuaria. Israel re ikuai ra'e oitocentos mil avakue joe opu'ãa py kyxe oiporu kuaa va'e. Ha'e rã Judá re ma quinhentos mil ikuai.

**1 Crônicas 21.7-17**

**10** Ha'e gui Davi heta va'e kuery oipapa ukapa ma rire opy'a py oendu ramo nda'eveia. Ha'e vy aipoe'i SENHOR pe:

— Ajejavy vaipa ra'e ha'e rami ajapoa py. Ha'e rami tei aý SENHOR, ajerure rembogue aguã xee nerembiguai ajejavyague, inhakã porã ve'ý va'e rami ajapo rire — he'i.

**11** Ko'ẽ aje'ive'i reve Davi ovv ramove Davi pegua imba'ekuaa va'e profeta Gade rupi SENHOR ombou oayvu. Ha'e vy aipoe'i ixupe:

**12** — Tereo aipo're Davi pe: “Po rami SENHOR ijayvu: ‘Mboapy regua va'e aikuua uka 'rã peteĩ eiporavo ajapo aguã’, he'i.”

**13** Ha'e ramo Davi-a py profeta Gade ovaẽ vy omombe'u. Ha'e vy aipoe'i:

— Reipota pa sete ma'etý re karuai ou ndeyvy re? Tyrã pa mboapy jaxy re renha ta reikovy nderovaigua kuery gui, ha'e kuery nemonha rã? Tyrã pa reipota mboapy ára re mba'eaxy vaikue oiko ndeyvy re? Eiporavo ke aý, ha'e emombe'u xembouare pe ambovai va'erã — he'i.

**14** Gade pe Davi ombovai:

— Xee ma ajexavaia aendu. Ha'eveve SENHOR po py anhemboaxa uka rã, mba'eta ha'e ma opa e'ý

va'e nhanemboaxy va'e. Ha'e rã avakue po py ma xee nanhemboaxa ukaxe — he'i.

<sup>15</sup> Ha'e rami rã SENHOR ombou mba'eaxy vaikue Israel yvy ha'e javi rupi, ko'ẽ aje'ive'i guive oa'angaague ára peve. Ha'e ramo Dã guive Berseba peve omano setenta mil avakue ha'e kuery regua.

<sup>16</sup> Ha'e gui Jerusalém áry SENHOR-a guigua anjo tetã omomba aguã opo oupi ho'amy jave SENHOR opytu'u ma mba'emo vai omoingoa gui. Ha'e vy aipoe'i anjo heta va'e kuery mombaarã ou va'ekue pe:

— Ha'eve ma, emboguejy ju ndepo — he'i. Ha'e va'e jave ma anjo hi'aí jebuseu regua Araúna mba'emo moa'yñaty yvy'iry.

<sup>17</sup> Ha'e gui anjo heta va'e kuery omomba rã Davi oexa vy ojapukai SENHOR pe. Ha'e vy aipoe'i:

— Xee rima ajejavý, xee rima hi'arandu e'ý va'e rami ajapo. Ha'e rã kova'e vixa'i kuery, mba'e tu ha'e kuery ojapo? Xerovai ae eupi ndepo, ha'e xeru ro pygua kuery rovai.

### *1 Crônicas 21.18-27*

<sup>18</sup> Ha'e va'e árave profeta Gade ou Davi oña py. Ha'e vy aipoe'i:

— Tereo na, ejapo SENHOR pe peteí altar-rã jebuseu regua Araúna mba'emo moa'yñaty py.

<sup>19</sup> Gade ayvu rupi SENHOR ojapo ukaague rami vy Davi oo.

<sup>20</sup> Ha'e gui Araúna ma yvy'ã re oña gui oexa huvixa guembiguai kuery reve jogueru nhoguenoiny ramo. Ha'e rami vy guenapy'ã re oñgova yvy peve.

<sup>21</sup> Ha'e vy oporandu:

— Xeruvixa, mba'e re tu ndee reju apy xee nerembiguai aĩa py?

Davi ombovai:

— Mba'emo moa'yīaty ajogua aguã rima aju, SENHOR pe altar-rã ajapo aguã, mba'eaxy vaikue heta va'e kuery áry ombou va'ekue optyu'u aguã — he'i.

<sup>22</sup> Ha'e rã Araúna aipoe'i Davi pe:

— Ejopy ha'e eme'ẽ SENHOR pe reme'ẽxe va'e, reipota va'e rei teĩ. Apy ma vaka ikuai reapy vy reme'ẽ va'erã. Oĩ avi yvyrapo mba'emo moa'yīaty regua yxakãrã, canga guive oĩ.

<sup>23</sup> Xeruvixa, ha'e nunga ha'e javi ndepo py xee Araúna ame'ẽmba — he'i.

Ha'e vy aipoe'ive ju:

— SENHOR Nderuete tojapo rejерurea.

<sup>24</sup> Ha'e rami teĩ huvixa ombovai Araúna pe:

— Any, ndegui xee ajogua 'rã hepyrã porã re, mba'eta SENHOR Xeruete pe name'ẽi 'rã xevy ome'ẽ rive pyre — he'i. Ha'e rami vy Davi ojogua mba'emo moa'yīaty, ha'e vaka re ma ome'ẽ cinqüenta hatã'i va'e prata guigua.

<sup>25</sup> Ha'e py ma Davi ojapo peteĩ altar SENHOR pe, ha'e vy ome'ẽ mba'emo oapy reve, peteĩ rami ikuia regua guive. Ha'e rami rã ha'e va'e yvy re SENHOR ojapo porã jevy ramo Israel kuery ikuia áry gui mba'eaxy vaikue optyu'u.

## **Nhanderuete ayvu iky'a e'ŷ va'e New Testament in Guaraní, Mbyá**

copyright © 2004 Wycliffe Bible Translators, Inc.

Language: Mbyá Guaraní (Guaraní, Mbyá)

Translation by: Wycliffe Bible Translators, Inc.

### **Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

### **The New Testament**

in Guaraní, Mbyá

**© 2004, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 18 Apr 2025 from source files  
dated 29 Jan 2022

3309fa3b-7590-5ae9-b829-5df4ddfbf957